

ChL 2720.1132


明史系案列傳第百七十六卷百七十六

方伎外戚宦官上

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

SEP 20 1982

71





明史藁

列傳第一百七十六

光祿大夫

經筵講官明史總裁戶部尚書加七級臣王鴻祈奉

改編撰

方伎

壽

葛乾孫

呂復

倪維德

周漢卿

王履

周顛

張中

張三才

張正常

劉淵然

袁瑛

戴思恭

盛寅

吳傑

皇甫仲和

全寅

凌雲

李時珍

繆希雍

周述學

哈佛大學哈佛燕京圖書館珍藏印



左氏載醫和緩梓慎裨竈史蘇姑布子卿之屬甚詳且核至於巫祝亦往往張其事以神之論者謂之浮誇要之各有其術不可誣也馬遷傳扁鵲倉公日者龜策而黃石赤松倉海君之流近於神仙荒忽亦具書之班氏則醫經雜占諸書並入藝文志其以方術名傳蓋自范蔚宗始後史因之姓名班班可臚也夫藝人術士匪能登乎道德之塗然古昔未之或廢伶倫之審音天老之決筮岐伯之辨疾病其學足參化機而軋理奧詎止小道可觀乎醫與曆朝廷皆爲設官其他則聽人自攻其術而已明興崇尚儒術家肄詩書人習孔孟尙已而方技者流挾其能以名當世者亦衆不能具錄採其術最靈驗者著於篇

滑壽字伯仁先世襄城人徙儀真後又徙餘姚幼警敏好學能詩京口王居中名醫也客儀真壽從之學授以素問難經壽卒業乃請益曰素問詳矣獨書多錯簡愚將分藏象經度等爲十二類抄而讀之難經又本素問靈樞其間榮衛藏府與夫經絡腧穴辨之博矣而缺誤或多愚將本其義旨注而讀之何如居中躍然曰甚矣子之善學也速爲之壽晨夕研究又參會張仲景劉守直李明之三家旣學鍼法於東平高洞陽盡得其術嘗言人身六脈雖皆有繫屬惟督任二經則苞乎腹背而有專穴諸經滿而溢者此則受之宜與十二經並論乃取內經骨空諸論及靈樞篇所述經脈著十四經發揮三卷通考隧穴六百四十有七他如讀傷寒論抄診家樞



要痔瘻篇及採諸書本草爲醫韻皆有功於世故所至人爭迎致以得其一言定死生爲無憾晚自號櫻寧生江南北浙東西無不知櫻寧生者年七十餘容色如童孺行步躡捷飲酒無算旣歿天台朱右撫其治疾神效者數十事爲之作傳故其所著述益有稱於後

葛乾孫字可久長洲人父應雷以醫名時北方劉守真張潔古之學未行於南有李姓者中州名醫官吳下與應雷談論大駭歎因出張劉書與相討究自是二家之學盛行於南應雷著醫家會同二十卷官浙江醫學提舉乾孫體貌魁碩膂力絕人好擊刺戰陣之法後折節讀書兼通陰陽律曆星命爲文章有名屢試不偶乃傳父業然不肯爲人治疾或施之

輒著奇效名與金華朱丹溪埒一書生傷寒不汗發狂循河走乾孫捽置水中良久出之裹以重棉乃汗而解富家女病四支痠痺目眩不能食衆醫治不效乾孫命悉去房中香奩流蘇之屬掘地坎置女其中令家人俟女手足動有聲則告久之女果舉手足而呼投藥一丸明日女自坎中出矣蓋此女平日嗜香而脾爲香氣所蝕故得是症其療病不用方藥如此至正時天下大亂乾孫推已祿命不利慨然謂其友曰聞中原豪傑並起而吾不得與命也今六氣淫厲吾犯咸池殆將死矣一日見武士引弓取挽之及殼歸卽下血命子煮大黃四兩飲之子密減其半血不下詰知其故語之曰無傷我命盡來年今則未也再服二兩而愈明年果卒



呂復字元膺鄞人少孤貧從師受經習詞賦後以母病求醫  
遇名醫衢人鄭禮之於逆旅遂謹事之因得其古先禁方及  
色脈藥論諸書討求一年試輒有驗自以爲未精盡購古今  
醫書晝夜研究務窮其間與自是出而行世取效若神其於  
醫門羣經如內經素問靈樞本草難經傷寒論脈經脈訣病  
原論太始天元玉册元詰六微旨五常政元珠密語中藏經  
聖濟經等書皆有辨論前代名醫如扁鵲倉公華佗張仲景  
孫思邈龐安常錢仲陽陳無擇許叔微張易水劉河間張子  
和李東垣嚴子禮王德膚張公度諸家皆有評騭所著有內  
經或問靈樞經脈箋五色診奇眩切脈樞要運氣圖釋養生  
雜言脈緒脈系圖難經附說四時變理方長沙傷寒十釋松

風齋雜著諸書浦江戴良採其治效最著者數十事爲醫案  
晚年自號滄洲翁歷舉仙居臨海教諭台州教授皆不就

倪維德字仲賢吳縣人祖父以醫顯維德幼嗜學已乃業醫  
以內經爲宗病大觀以來醫者率用裴宗元陳師文和劑局  
方故方新病多不相合乃求金人劉完素張從正李杲三家  
書讀之出而治疾無不立效周萬戶子八歲昏眊至不識饑  
飽寒暑時以土炭自塞其口維德診之曰此慢脾風也脾藏  
智脾慢則智短急以疎風助脾劑投之卽愈顧顯卿右耳下  
生癭大與首同痛不可忍更數十醫莫能治維德曰此手足  
少陽經受邪也煮藥飲之踰月而愈劉子正妻病氣厥或哭  
或笑人以爲祟所憑維德曰兩手脈俱沈胃腕必有所積積



則痛問之果然以生熟水導之吐痰涎數升而愈盛架閣妻  
左右肩臂奇癢延及頭面不可禁灼之以艾則暫止維德診  
其左脈沈右脈浮且盛曰此滋味過厚所致也投以劑旋已  
林仲實以勞得熱疾熱隨日出入爲進退暄盛則增劇夜涼  
及雨則否如是者二年維德曰此七情內傷陽氣不升陰火  
漸熾故溫則進涼則退投以東垣內傷之劑其疾立止他所  
療治多類此常言劉張二氏多主攻李氏惟調護中氣主補  
蓋隨時推移不得不然故其處方不執一說常患眼科雜出  
方論無全書著元幾啓微又校訂東垣試效方並刊行於世  
洪武十年卒年七十五

周漢卿松陽人善醫鄉人蔣仲良主目爲馬所踉睛突出如

桃他醫謂係絡已損不可治漢卿封以神膏越三日復故華  
州陳明遠瞽十年漢卿視之曰可鍼也爲翻睛刮翳歛然辨  
五色武城人病胃痛奮擲乞死漢卿納藥於鼻俄噴赤虫寸  
許口眼悉具痛旋止馬氏婦有娠十四月不產尪且黑漢卿  
診之曰此中蠱非娠也下之藥有物如金魚病良已永康人  
腹疾痾屢行漢卿解衣視之氣衝起腹間者二其大如臂刺  
其一若然鳴又刺其一亦如之加以按摩疾遂愈長山徐姬  
構癩疾發時手足顫掉裸而走或歌或笑漢卿刺其十指端  
出血而愈錢塘王氏女生瘰癧環頭及腋凡十九竅竅破白  
潘出將死矣漢卿爲剔竅母深二寸其餘烙以火數日結痂  
愈山陰楊翁項有疣如瓜大醉仆墜下潰血不能止疣潰者



必死漢卿以藥糝其穴血即止義烏陳氏子腹有塊捫之如  
罌或以為奔豚或以為癥瘕漢卿診之曰此腸癰也用大鍼  
灼而刺之入三寸許膿隨針迸出有聲愈諸暨黃生背曲須  
杖行他醫皆以風治之漢卿曰血溢也刺兩足崑崙穴頃之  
投杖去其捷效如此

王履字安道崑山人學醫於金華朱彥修盡得其術嘗謂張  
仲景傷寒論為諸家祖後人不能出其範圍且素問云傷寒  
為病熱言常而不言變至仲景始分寒熱立辨然義猶未盡  
乃備常與變作傷寒立法考又謂陽明篇無日痛少陰篇言  
胸背滿不言痛太陰篇無盛乾厥陰篇無囊縮必有脫簡乃  
取三百九十七法去其重複者得二百三十八條復增益之

仍為三百九十七法極論內外傷經旨異同併中風中暑辨  
名曰泝洄集凡二十一篇又著百病鈞元二十卷醫韻統一  
百卷學醫者宗之履工詩文兼善繪事常遊華山絕頂作圖  
四十幅記四篇詩一百五十首為時所稱自滑壽葛乾孫呂  
復周漢卿輩及履皆元末人至明初始卒

周顛建昌人無名字年十四得狂疾走南昌市中乞食語言  
無恒人因呼之曰顛年三十餘忽有異狀長官初至必入謁  
曰告太平當是時天下猶寧謐人莫測其所謂也其後陳友  
諒據南昌顛獨無語及太祖克南昌顛謁於道左洎還金陵  
顛亦隨至一日駕出顛來謁問此來何為對曰告太平自是  
每出輒以是告太祖久而厭之命覆以巨缸積薪煨之薪盡



火息啓缸視則顛者凝然無恙頂上出微水而已命寄食蔣山寺已而僧來告顛與沙彌爭飯怒而不食半月矣太祖往視顛來逐無饑色乃設盛饌與共食食已諭主僧絕其粒一月比後往視如故諸將士競進酒饌茹而吐之太祖與共食則不吐久之太祖親征陳友諒名問曰此行可乎對曰可曰彼已稱帝與之戰不亦難乎顛仰首咏天正容曰天上無他座太祖攜與行舟次安慶無風遣使問之曰行自有風不行則無風須臾風果大作直抵小孤太祖慮其妄言惑軍心使人守之顛見江豚戲水忽曰水怪見損人多守者以告太祖惡之命投於江及師至湖口則顛復來見且乞食太祖益異之既與食即整衣作遠行狀遂辭去太祖既殯友諒遣使往

廬山物色之不得蹤跡疑其仙去洪武中太祖親撰周顛仙傳紀其事

張中字景華臨川人少讀書應進士舉不第遂放情山水遇異人授數學談禍福多奇中太祖下南昌以鄧愈薦名中賜之坐問曰予下豫章兵不血刃此邦之人自是少息乎對曰未也旦夕此地當流血廬舍焚燬殆盡鐵柱觀亦在煨燼中所存一殿未幾指揮康泰反一如中言已言國中大臣有變宜豫防至秋平章邵榮參政趙維祖伏甲北門為亂事覺伏誅明年太祖祭山川百神覆舟山下問中何如對曰吉天馬兩重似拜似舞祀訖馬忽人立作舞狀復俯首若拜而是日中原獻名馬果符兩重語陳友諒圍南昌三月太祖伐之名



問中中言五十日當大勝亥子之日獲其渠帥帝命中從行舟次孤山無風弗能進中以洞元法祭之風大作遂達鄱陽大戰湖中常遇春孤舟深入敵舟圍之數重衆憂之中曰無憂亥時當自出已而果然連戰大勝友諒中流矢卒降其衆五萬自啓行至受降過五十日始南昌被圍帝問何日當解中對七月丙戌比報至乃乙酉蓋術官算曆是月差一日實在丙戌也其占驗奇中多若此爲人狷介寡合與之言稍涉倫理輒亂以他語類佯狂玩世者生平好戴鐵冠人稱爲鐵冠子云

張三丰遼東懿州人名全一一一名君寶三丰其號也以其不飭邊幅又號張邈邈頎而偉龜形鶴背大耳圓目鬚髯如戟

寒暑惟一衲一簑所啖升斗輒盡或數日一食或數月不食書經目不忘或處窮山或游市井能一日千里嬉笑諧謔旁若無人嘗游武當諸巖壑語人曰此山異日必大興時五龍南巖紫霄俱毀於兵火三丰去荆榛辟瓦礫與其徒創草廬居之已而舍去行游四方太祖故聞其名洪武二十四年遣使徧覓之不遇後居寶雞之金臺觀一日自言當辭世留頌而逝縣人共棺殮之及葬聞棺內有聲啓視則復活乃游四川見蜀獻王復入武當歷襄漢不常厥處永樂中成祖遣給事中胡濙偕內侍朱祥齋壘書香幣往訪累年窮阨僻壤皆到迄不遇乃命工部侍郎郭璉隆平侯張信等督丁夫三十餘萬人大營武當宮觀費以數百萬計既成賜名太和太岳



山設官鑄印以守竟符三丰言或言三丰金時人元初與劉秉忠同師後學道於鹿邑之太清宮與里人張毅相習毅四世孫朝用嘗遊寶雞遇三丰問汝家名毅者爲誰荅曰吾高祖也三丰曰吾曾見其始生時今孺子亦漸長努力讀書官可至三品後亦符其言天順三年英宗賜誥贈爲通微顯化真人然竟莫測其存亡也

張正常字仲紀漢張道陵四十二代孫也世居貴溪龍虎山元時賜號天師太祖克南昌正常遣使上謁已而兩入朝洪武元年入賀卽位太祖謂宰臣曰元人不知義理稱爲天師夫天豈有師可改授正一嗣教真人錫以銀印秩視二品設寮佐曰贊教曰掌書自是爲制十年秋命偕李善長祀嵩山

還家卒長子宇初嗣建文年坐不法削真人號奪印誥成祖卽帝位復之宇初頗知書能詩其道法則受之長春真人劉淵然後與淵然不協相詆訐人輕之永樂八年卒弟宇清嗣宣德初淵然進號大真人宇清入朝欲與並懇禮部尚書胡濙濙爲請宣宗重違濙意從之加號崇謙守靜二年卒宇初子懋承嗣正統九年卒孫元吉嗣元吉年幼勅其祖母護持而贈其父留綱爲真人封母高氏爲元君景泰五年入朝乞給道童四百二十人度牒濙復爲請許之尋欲得大真人號濙又爲請報可天順四年奏言祖母年老乞改勅臣母護持臣等一意精修禮部言元吉年長無須母護持不必改勅七年再乞給道童三百五十人度牒禮部尚書姚夔持不可詔



許度百五十人先是元吉已賜號冲虛守素昭祖崇法安恬樂靜元同大真人加封其母爲慈惠靜淑太元君憲宗立元吉復乞加母封號爲六字改太元君爲太夫人并增已封號乃改元吉號爲體元悟法淵默靜虛闡道弘化妙應大真人而加其母爲慈和端惠貞淑太真君惟太夫人以吏部言不許元吉素兇頑久益甚僭用乘輿器服擅易制書時奪良家子女逼取人財物家置獄小忿輒鞭箠至死前後殺四十餘人有一家三人者衆怵其威莫敢訴監司郡縣亦受其餌不發有諸生蔡讓者不勝憤因巡按御史趙致詢民瘼遂具陳元吉不法狀其族父留煥輩復詣闕上聞憲宗怒遣官按治得實械元吉至京會百官廷訊元吉具服於是刑部尚書陸

瑜等上言張氏在前代未有官封宋止授真靜先生逮乎元世始加封爵令視三品我太祖去天師而稱真人未欲遽絕其後也延至於今子孫不肖往往爭襲成讐今元吉所犯罪當重辟神人共憤竊以張氏無功於國無補於世宜絕其廕封扶翼正教籍其族而徭役之毋令印行符籙惑世誣民毀其府第革其所設管勾都目諸人庶邪教不興正道永賴疏入命元吉如擬繫獄候決妻削元君號封廕仍舊制擇其族人授之有妄稱天師印行符籙者罪不貸時成化五年四月也元吉善蠶緣其冬竟免決明年冬法司復請決詔免死杖百發肅州軍於是刑科毛弘等言元吉罪重請卽誅帝不許尋釋爲庶人其族人光範以前詔請襲真人職元慶違詔與



平有司庇元慶迄獲嗣而符錄仍印行如故其後憲宗好道妖人李孜省趙玉芝等競進元慶恩寵亦數加弘治中卒子彥頤嗣正德末武宗駐蹕南京彥頤來覲因從駕北還嘉靖二年進號大真人已而上清宮災彥頤請重建帝命中官督有司繕治工科都給事中黃重等抗疏諫不納彥頤知天子好神仙遣其徒十餘人乘傳詣雲南四川諸處稱採取遺經古器進尚方且以蟒衣玉帶遺鎮守中貴雲南巡撫歐陽重劾其擾害遠方惑衆罔利請捕治詔江西按臣覈訪及按臣以實聞帝不罪十六年禱雪內廷有驗賜金冠玉帶蟒衣銀幣易其銀印爲金旣還山遣行人齋勅稱卿而不名所經郵傳供應或後期彥頤入朝奏於帝常山知縣吳襄等皆下按

臣治久之卒子永緒嗣嘉靖末卒無子有郭諫臣者素惡其妄及官吏部主事當穆宗初政上章請奪其世封禮部尚書高儀請下江西守臣議巡撫任士憑等力言宜奪乃命去真人號授爲上清觀提點秩五品給銅印以其宗人國祥爲之時隆慶二年正月也萬曆五年國祥求復故封馮保等主之還其真人金印三十年名之修醮國祥奉母至未幾母歿請卹典禮部尚書馮琦言非制乞絕其妄求帝曰卿等言是但其母遠來遽卒殊可憫其予祭九壇琦等乃不復言國祥傳至應京崇禎十四年帝以天下多故召應京有所祈禱旣至命賜宴禮臣言天順中制真人不與宴但賜筵席遵循已久卽歲時朝覲賜酒饌光祿鴻臚兩寺不聞肆設今應京奉有



優待明旨臣部稽慶成宴禮法王佛子宴於大慈恩寺以內官待則真人應宴於靈濟宮亦以內官待從之明年三月應京請加三官封號且請齋論中外一體尊奉禮官力駁其謬事得寢張氏自正常以來專恃符籙祈雨驅鬼間有小驗故其教代相傳襲而卒莫廢去云

劉淵然贛縣人幼出家爲祥符宮道士後詣雩都紫陽觀師趙原陽傳其法能呼召風雷洪武二十六年太祖聞其名召之既至入對便殿賜號高道館朝天宮永樂中從駕至北京仁宗嗣位賜號冲虛至道元妙無爲光範衍教莊靜普濟長春真人給二品印誥與正一真人等宣德初進號大真人七年乞骸骨命送南京朝天宮御製山水圖歌賜之卒年八十

二閔七日入斂端坐若生淵然有道術爲人清靜自守不干世事故爲累朝所禮正一真人張宇初之術淵然所授也其徒有郤以正者雲南人早得法於淵然淵然請老薦之名爲道錄司左元義正統中遷左正一領京師道教事景泰時賜號悟元養素凝神冲默闡微振法通妙真人英宗復辟以正具疏辭詔以左正一閒住未幾真人張元吉薦其戒行詔復真人仍掌道教先是百官賜宴正一真人列二品班之末天順三年將行慶成宴禮官請正坐次帝曰殿上宴文武官真人安得與其送筵席與之以正廉靜謙謹禮度雍容縉紳咸重之六年八月卒遣官致祭又有沈道寧者亦有道術仁宗初命爲混元純一冲虛湛寂清靜無爲承宣布澤助國祐民



廣大至道高士階正三品賜以法服時天子頗信異教旣褒  
崇道流其釋子有智光者亦賜號圓融妙慧淨覺弘濟輔國  
光範衍教灌頂廣善大國師錫以金印英宗嗣位復加號西  
天佛子錫以玉印其崇信如此智光武定人洪武時奉命兩  
使烏斯藏榜葛刺泥八刺地溥塔諸國永樂時又使烏斯藏  
迎尚師哈立麻遂通番國諸經多所翻譯歷事六朝寵錫冠  
羣僧然與淵然輩淡泊自甘不失戒行迨成化正德嘉靖朝  
邪妄雜進恩寵濫加所由與先朝異矣

袁珙字廷玉鄞人高祖鏞宋季舉進士元兵至不屈舉家十  
七人皆死父士元翰林檢閱官珙生有異稟好學能詩嘗遊  
海外洛伽山遇異僧別古崖授以相人術先仰視皎日目盡

眩令辨暗室赤黑豆又懸五色線窗外令映月別其色所試  
皆無訛然後相人其法以夜中然兩炬視人形狀氣色而參  
以所生年月百無一謬元至正時出游浙西與憲史陳泰項  
昕沈博鄭文祖交謂泰神庭金匱有黑氣日中當黜謂昕地  
角有魚鱗文不三日家將火謂博中部赤白氣貫點點若梅  
花三月內有父服謂文祖印堂山根紅氣見夏秋當赴辟辟  
必南方泰於其日午漏上爲主者糾退昕次日所居屋災博  
以父憂去果三閱月文祖爲福建帥府史亦如期憲副李志  
憲僉堅不花字木魯育普顏達失史銓有所問荅曰李公蘭  
臺色慘將旬日死堅公天庭色紅四十九日遷官南方魯公  
口有氣光而青黑乘之三百日內不祿普公陰位微紅主祿



位然不宜動動則凶史公祿庫權準赤黑氣如雲行兼之法  
令有白氣三七日解官李以次年正月卒堅三遷皆南地魯  
至期以喪訃普時失官旋復職後寄死野人家史以言不行  
去位家居時南臺大夫普化帖木兒由閩海道寧見珙珙曰  
公神氣嚴肅舉動風生大貴驗也但印堂司空有赤氣到官  
一百十四日當奪印然守正秉忠名垂後世願自勉普署臺  
事於越果爲張士誠逼取印綬抗節死見江西憲副程徐曰  
君帝座上黃紫再見千日內有二美除但冷笑無情非忠節  
相也徐於一年後拜兵部侍郎擢尚書後仕明太祖爲吏部  
侍郎劉仁本張啓源鄭文寶丘楠請占珙視仁本清中有濁  
啓源濁中有清視文寶楠九州光澤精神澄徹曰公等不十

年官二品且晚節皆得譴吾且見之其後俱授樞密分院副  
使明太祖初啓源文寶就戮仁本死獄中楠亦責貶啓源在  
分院時珙曰公山根赤色浮見二日內當有火厄次夕啓源  
家燬質明又曰火氣猶未退啓源猥曰我家已燬盡尚何火  
俄而別業亦焚南臺中丞月魯不花治書胡均兵部侍郎揭  
法將赴北會於上虞珙曰月公膚似凝脂目如點漆聰睿而  
文官上品今秋有中臺之命然不宜往往則不祥問故珙曰  
面有黑赤氣如玉印紋玉印除拜象也然紫赤火色豈宜往  
水位胡公鼻梁聳得陰貴助司空揚州分野紅氣潤澤六八  
日內除南方臺職揭公骨氣巉巖舉動端慤館閣器也但神  
庭金匱黑氣如弓此去大不利縱有美擢而到任難矣月泛



海而北果爲倭寇所害妻妾皆被掠胡拜侍御史開府於閩揭與倭寇之難脫身赴北授秘書少監未任而國事去珙見方國瑛謂之曰公神氣不常舉動急速性靈而氣暴當以武起家十年至一品乃見其從子明華明敏曰明華眼長而眉大重額廣而日角不瑩非喪父官不顯也明敏邊地赤氣如刀劍紋二九日內因父功進爵可二品國瑛官浙江分省後至平章明華父死於兵對品襲職至分省左丞明敏從父克太倉有功封分省參政陶凱張順祖楊天顯往見珙曰陶君五岳朝揖而氣色未開五星分明而光澤未見宜藏器待時不十年以文進爲異代臣官二品其在荆揚間乎張君面如洗而中準黑蘭臺慘福去禍來非壽徵也楊君色青身小語

言清亮亦主以文進其邊地有氣如雲行月出交夏四七日遠動得吉凱後爲禮部尚書湖廣行省參政順祖次年病死天顯赴北爲省都事其術之精類如此洪武中遇姚廣孝於嵩山寺謂之曰公劉秉忠之儔也幸自愛後廣孝薦於燕王召至北平王偕衛士類已者九人操弓矢雜飲肆中珙一見卽前跪曰殿下何輕身至此九人者笑其謬珙言愈切王乃起入宮召見珙諦視曰龍行虎步日角插天太平天子也年四十鬚過臍卽登大寶矣已見藩邸諸校卒皆許以公侯將帥王慮語洩遣之還及卽位召拜太常寺丞賜冠服鞍馬文綺寶鈔及居第帝將建東宮而意有所屬故久不決俾珙相仁宗曰天子也相宣宗曰萬歲天子儲位乃定珙相人卽知



其心術善惡人不畏義而畏禍患往往因其不善導之於善從而改行者甚多爲人孝友端厚待族黨有恩自號柳莊居士有柳莊集以永樂八年卒年七十有六賜祭葬贈太常少卿子忠徹字靜思幼傳父術從父謁燕王王厚遇之建文中復召至王宴北平諸文武使忠徹視之謂都督宋忠面方耳大身短氣浮布政使張昺面方五小行步如蛇都指揮謝貴擁腫蚤肥而氣短都督耿欒顴骨插鬢色如飛火僉都御史景清身短聲雄於法皆當以刑死王大喜起兵意益決及爲帝卽名授鴻臚序班賜賚甚厚遷尚寶司丞永樂五年改中書舍人扈駕北巡駕旋皇太子爲讒言所中帝怒擢午門凡東宮所處分事悉不行太子憂懼得疾帝命蹇義金忠偕忠

徹視之還奏東宮面帶青藍驚憂象也收午門榻可愈帝從之太子疾果已帝嘗屏左右密問武臣朱福朱能張輔李遠柳升陳懋薛祿文臣姚廣孝夏原吉蹇義金忠呂震方賓吳中李慶等禍福後悉符其言九載秩滿復爲尚寶司丞進少卿禮部郎周訥自福建還言閩人祀南唐徐知誨知誨其神最靈帝命往迎其像及廟史以來遂建靈濟宮於都城而祀之帝每遭疾輒遣使問二神廟史乃詭爲仙方以進其藥性多熱服之輒痰壅氣逆多暴怒至失音中外不敢諫忠徹一召入侍進曰此痰火虛逆之症實靈濟官符藥所致帝怒曰仙藥不服服凡藥耶忠徹叩首哭內侍二人亦哭帝益怒命曳二內侍杖之且曰忠徹哭我我遂死耶忠徹惶懼趨伏階



下待罪良久始解帝識忠徹於藩邸故待之異於外臣忠徹亦以帝遇已厚敢進讜言嘗諫取寶外國之非武臣宜許行服衍聖公宜改賜玉軸聞者避之宣德初賭帝容色曰七日內宗室當有謀叛者漢王果反嘗坐事下吏罰贖正統中復坐事下吏休致居二十餘年卒年八十有三忠徹相術不殊其父世所傳軼事甚多不具載其相王文謂面無人色法曰瀝血頭相于謙謂日常上視法曰望刀眼後果如其言然性陰賊不如其父與羣臣有隙卽緣相法於上前齟齬之頗好讀書所著有人像大成及鳳池吟藁符臺外集內載宋瀛國公軼事云

戴思恭字原禮浦江人以字行受學於義烏朱震亨震亨師金華許謙以上接朱子之傳又學醫於宋內侍錢塘羅知悌知悌得之荆山浮屠浮屠則河間劉守真門人也震亨醫學大行時稱爲丹溪先生一見思恭愛其才敏盡以醫術傳之思恭遂以醫鳴洪武時徵爲御醫有所療治立効太祖愛重之燕王患痘韓真治不效太祖遣思恭往治問所用藥良是思恭念何以不效乃問王何嗜曰嗜生芹思恭曰得之矣投一劑夜暴下視之皆細蝗也晉王末疾思恭療之愈已再發卽卒太祖怒逮治王府諸醫思恭從容進曰臣嘗奉命視王疾啓王曰疾今卽愈但毒在膏肓卽復作不可療也今果然矣諸醫由是免死一妃嗜燒酒致腹痛治之而瘥思恭曰十年必復發發則難救後果驗思恭時已老風雨輒免朝太祖



得疾少間出御右順門名諸醫侍疾無狀者悉付獄獨慰思恭曰汝仁義人也事無預汝毋恐已而駕崩太孫嗣位罪諸醫獨擢思恭太醫院使遼簡王聞太祖語大書仁義二字賜之肅莊王慶靖王咸爲贊咏以賜永樂初以年老乞骸骨奏四上乃許三年夏遣使者徵入免其拜特召乃進見其冬復告歸遣官護送賚金幣踰月而卒年八十有二遣行人致祭所著有證治要訣證治類元類證用藥總若干卷皆隱括丹溪之書爲之又訂正丹溪金匱鈞元三卷間附以己意人謂無愧其師云

盛寅字啓東吳江人受業於郡人王賓初金華戴原禮客吳下賓與之游莫得其醫術原禮笑曰吾固無所吝君獨不能少屈乎賓謝曰吾老矣不能復居弟子列他日伺原禮出竊發其書以去醫遂有名將死無子以授寅寅旣得原禮之學復討究內經以下諸方書醫道大行永樂初爲醫學正科坐累逮入南京至則駕已北幸輪作天壽山列侯監工者見而奇之令主書算先是有中使督花鳥於江南主寅舍病脹寅愈之適遇諸途驚曰盛先生固無恙耶予所事太監正苦脹曷與我視之旣視投以藥卽愈適成祖西苑較射太監往視成祖遙望見愕然曰謂汝死矣安得生太監具以告因盛稱寅卽召入便殿令診脈寅奏上脈有風濕病帝大然之曰吾逐寇出塞動至經年爲風寒所侵吾謂是濕而諸醫不知幾悞我進藥果效遂授御醫一日雪霽召見帝語白溝河戰勝



狀氣色甚厲寅曰是殆有天命耳帝不懌起而視雪寅復咏唐人詩長安有貧者宜瑞不宜多句聞者咋舌他日與同官對奕御藥房帝猝至兩人斂枰伏地謝死罪帝命終之且坐以觀寅三勝帝喜命賦詩立就帝益喜賜象牙棋枰并詞一闕帝晚年猶欲出塞寅以帝春秋高勸毋行不納果有榆木川之變仁宗在東宮時妃張氏經期不至者十月衆醫以任身賀寅獨謂不然出言病狀妃遙聞之曰醫之言甚當有此人奈何不令早視我及疏方乃破血劑東宮怒不用數日脹益甚命寅再視疏方如前妃令進藥而東宮慮墮胎械寅以待已而血大下病旋愈當寅之被繫也闔門惶怖曰是殆磔死或曰且籍沒既三日紅仗前呼還即舍賞賜殊腆寅與袁

忠徹素爲東宮所惡既愈妃疾度怒稍解然意猶甚懼忠徹曉相術知仁宗壽不永密言於寅寅猶畏禍及仁宗嗣位求出爲南京太醫院宣宗立名還以正統六年卒初寅晨直御藥房忽昏眩欲死募人療寅莫能應一草澤醫人應之一服而愈帝問狀其人曰寅空心入藥房卒中藥毒能和解諸藥者甘草也帝問寅果空腹入乃厚賜草澤醫人而遣之

吳傑武進人弘治中以善醫徵至京師下禮部試故事高等入御藥房次入太醫院下者遣還時傑在高等而當遣者甚衆傑言於尚書曰國家三四十載纔一徵醫若等幸被徵又待次都下十餘載一旦遣還誠流落可憫傑願辭御藥房與諸人同入院尚書義而許之正德中武宗得疾傑一藥而愈



帝喜甚即擢御醫一日帝射獵還憊甚感血疾服傑藥即愈  
進一官賜彪虎衣嘗幸虎園虎騰而驚傑療之立愈再進一  
官賚銀幣頃之試馬腹痛又以傑藥而愈賚繡春刀及銀幣  
帝每行幸必以傑從積至太醫院使帝欲南巡傑諫曰聖躬  
未安不宜遠涉帝怒叱左右掖出及駕還漁於清江浦溺而  
得疾至臨清急遣使召傑及至疾已深遂扈歸通州時江彬  
握兵居左右慮帝晏駕已得禍力請幸宣府傑憂之語近侍  
曰疾亟矣僅可還大內倘至宣府有不諱吾輩寧有死所乎  
近侍懼百方勸帝始還京甫還而帝崩彬伏誅中外晏然不  
然變且不測未幾傑致仕子希周進士戶科給事中希曾舉  
人有許紳者京師人初供奉御藥房嘉靖改元授御醫屢遷

太醫院使受知於世宗連加通政使禮部侍郎工部尚書竝  
領院事二十年宮婢楊金英等謀逆以帛縊帝氣已絕紳急  
調峻劑下之辰時下藥未時忽作聲去紫血數升遂能言又  
數劑而愈帝德紳加太子太保禮部尚書賜賚甚厚未幾紳  
得疾或問之紳曰吾不起矣曩者官變吾自分不效必殺身  
因此驚悸非藥石所能療已而果卒賜諡恭僖官其一子卹  
典有加明世醫者官最顯止糾一人其士大夫以醫名者有  
王綸王肯堂綸字汝言慈谿人舉進士遷禮部郎中歷廣東  
參政湖廣廣西布政使正德中以右副都御史巡撫湖廣綸  
精於醫所在為人治疾無不立效有本草集要名醫雜著行  
於世肯堂字宇泰金壇人舉進士改庶吉士授檢討歷官參



政都御史樵子也生平博極羣書兼通醫學所著證治準繩為醫家所宗

皇甫仲和睢州人精天文推步學永樂中成祖北征仲和以占袁忠徹以相竝扈從師至漠北不見寇將引還命仲和占言今日未申間寇當從東南來王師始却終必勝忠徹對如之帝怒曰汝二人朋比欺我乎命械之且曰今日寇不至二人皆死乃命中官往偵之口中不至復召二人占對如初頃之中官奔告曰寇大至矣時初得安南神砲寇一騎直前即以砲擊之一騎復前再擊之寇不動帝登高望之曰東南不少却乎亟麾大將譚廣等進擊諸軍奮斫馬足寇稍退俄疾風揚沙兩軍不相見寇始引去帝即欲班師二人曰明日寇

必降請待之至期果降帝始神具術授仲和欽天監正英宗將北征仲和時已老學士曹鼐問曰駕可止乎胡王兩尚書已率百官諫矣曰不能止也紫微垣諸星已動矣曰然則奈何曰盍先治內曰命親王監國矣曰不如立儲君曰皇子幼未易立也曰恐終不免立及車駕北狩景帝遂即位寇之薄都城也城中人皆哭仲和占之曰勿憂雲向南大將氣至寇退矣明日楊洪等入援寇果退一日出朝有衛士從仲和占仲和笑曰汝不能正內何以占為衛士怒曰安知我不能正內曰汝室中妻妾正相鬪可速返返則方鬪不解或問何由知曰彼問時適見兩鵲鬪屋上是以知之其占事率類此全寅字景明安邑人生十二歲而警乃從師學京房術為人



占禍福多奇中父清游大同攜之行塞上石亨爲參將酷信之每事咨焉英宗北狩遣使問還期筮得乾之初寅曰大吉四爲初之應初潛四躍明年歲在午其干庚午躍候也庚更新也龍歲一躍秋潛秋躍明年仲秋駕必復但繇勿用應在淵還而復必失位然象龍也數九也四近五躍近飛龍在丑丑曰赤奮若復在午午色赤午奮於丑若順也天順之也其於丁象大明也位於南方火也寅其生午其壬壬其合也至歲丁丑月寅日午合於壬帝其復辟乎已而悉驗石亨入督京營挾與偕及也先逼都城城中人恟懼或請筮之寅曰彼驕我盛戰必勝寇果敗去明年也先請遣使迎上皇廷臣疑其詐寅力言於亨曰彼順天仗義我中國反失奉迎禮寧不

貽笑外蕃亨乃與于謙決計上皇果還景泰二年錦衣指揮盧忠告變外議洵洵忠一日屏人請筮寅叱之曰是兆大凶死不足贖忠懼而佯狂事得不竟已而忠果伏誅英宗復辟將官寅寅固辭命賜金錢金卮諸物其父官指揮僉事將赴徐州英宗慮寅偕行乃授錦衣百戶留京師寅見石亨勢盛每因筮戒以持滿之道亨不能用卒及於禍寅以筮遊公卿貴人間莫不信重之然無一語及私年幾九十乃卒

凌雲字漢章歸安人爲諸生棄去北遊泰山古廟前有病人氣息垂絕雲嗟嘆久之一道人忽問曰汝欲生之乎曰然道人針其左股立蘇語雲曰此人毒氣內侵非死也毒散自生耳因授以針術雲拜受之爲人治疾無不效里人嗽不止絕



食五日衆醫以爲虛投補劑愈甚雲曰此寒濕積也穴在頂針之必暈絕逾時始蘇命四人分牽其髮使勿傾側乃針果暈絕家人皆哭雲言笑自如頃之氣漸舒復加補始出針嘔積痰斗許病卽除有男子病後舌吐雲兄亦知醫謂雲曰此病後近女色太蚤也舌者心之苗腎水竭不能制心火病在陰虛雲曰然兄曰其穴在左股太陽是當以陽攻陰雲曰然如其穴針之舌吐如故兄茫然自失雲曰此知瀉而不知補也補數劑舌漸復故淮陽王病風三載請於朝召四方名醫治不效雲投以針不三日行步如故金華富家婦少寡欲火熾失心始見屋柱走抱之久之見帚杖諸物卽以兩手爬之甚至裸形野立雲視之曰是謂喪心吾針後須蔽以帳其心

正當知恥乃令二人堅持之用凉水噴面針其心次補泄並施不踰時狂疾頓除屬其家人慰以好言釋其愧恥病遂不發吳江貴家婦臨產胎不下者三日呼號求死雲針刺其心針出兒應手下主人喜問故曰此抱心生也針出則手舒手舒則胎下取兒掌視之有針痕孝宗聞雲名召至京命太醫官出銅人蔽以衣而試之所刺無不中乃授御醫年七十七卒於家子孫傳其術海內稱針法者曰歸安凌氏有李玉者官六安衛千戶善針灸或病頭痛不可忍雖震雷不聞玉診之曰此蟲啖腦也合殺蟲諸藥爲末吹鼻中蟲悉從眼耳口鼻出卽愈有跛人扶雙杖至玉針之立去其杖兩京號神針李玉兼善方劑或病痿玉察諸醫之方與治法合而不效疑



言曆者以郭守敬為最而守敬所作曆經載於元史者言理  
而不言法曆官所傳止有通軌通經諸書其作法根本所謂  
弧矢割圓曆官棄弗道傳遂絕武進唐順之長興顧應祥皆  
究心曆學求其書不可得述學殫精研思遂通弧矢之術從  
來曆家所步者二曜交食五星順逆而已自西域日回經緯  
曆入中國始聞經緯凌犯之說然其立法度數與中曆不合  
名度亦異順之慨然欲赫緯法以會通中西卒官不果述學  
乃撰中經用中國之算測西域之占以畢順之之志日行黃  
道月行九道古來無所謂星道者述學推究五緯細行為星  
道五圖於是七曜皆有道可求與順之論曆取歷代史志之  
議正其訛舛刪其繁蕪然於西域之理未能通也又撰大統

萬年二曆通議以補歷代之所未及自曆以外圖書皇極律  
呂山經水志分野輿地算法太乙壬遁演禽風角鳥占兵符  
陣法卦影祿命建除葬術五運六氣海道針經莫不各有成  
書凡一千餘卷統名曰神道大編嘉靖中錦衣陸炳訪士於  
經歷沈鍊鍊舉述學炳禮聘至京服其英偉薦之兵部尚書  
趙錦錦就訪邊事述學曰今歲主有邊兵應在乾艮艮為遼  
東乾則宣大二鎮京師可無虞也已而果然錦將薦諸朝會  
仇鸞聞其名欲致之述學識其必敗乃還里總督胡宗憲征  
倭召置幕中亦不能薦以布衣終



對公置幕中亦不稍黷以亦交錄

升鸞閣其各將姪之也學精其必規以數里盛晉時宗憲至  
東望順宣大二龍京相可無與出日而果然離深談諸博會  
賦離離掠荷學事並學日今茲主育學兵戰亦掉貝貝為  
豎豎亦難舉並學賦甄甄至京眼其英制蕙之共陪尚書  
書凡一千餘卷錄各日輒數大辭嘉辭中離亦對兩請士然  
朝式佳邊新命數制蕙滿正數六辰我數極豎莫不各其  
呂山豎水志公理輿此莫去太了壬豎會風魚息古兵  
萬平二習豎豎以離豎升之視未次自視以水圖書皇豎豎

明史藁

列傳第一百七十七

光祿大夫 經筵講官明史總裁戶部尚書加七級臣王鴻緒奉

敕編撰

外戚

陳公

馬公

呂本

馬全

張騏

胡榮

孫忠

吳安

錢貴

汪泉

杭昱

周能

王鎮

萬貴

邵喜

張巒

夏儒

陳萬言

方銳

陳景行

李偉



王偉

鄭成憲

王昇

劉文炳

張國紀

周奎

自古外戚之禍莫若兩漢唐宋以下少殺矣明太祖禁母后臨朝后妃之家崇其號名衣食縣官而已是以綿祚悠遠初無安陽博陸梁竇何董之變匪直消禍於履霜也椒房貴戚亦藉以保福胙逮子孫焉英宗時惟會昌侯孫繼宗以奪門功參議國是自茲以下其賢者類多謹身奉法謙謙有儒者風無所建樹而一二怙恩負乘之徒所好不過狗馬音樂田宅所狎不過俳優伎妾所凌虐不過閭閻雛匹與僮厮養之屬雖汰如壽寧兄弟陰謀如鄭國泰在廷諸臣輒皆正論讜言消其釁孽謂非祖宗法制之善哉至若惠安新樂咸舉宗殉國殺身成仁嗚呼卓矣其成祖后家詳中山王傳餘採其行事可紀者作外戚傳

陳公逸其名揚州人淳皇后父也宋末從張世傑軍厓山世傑死陳公舟亦敗得脫棲海島糧絕同棲者將往鬻馱山食死馬陳公夢白衣人戒曰勿往食夜有舟至可共載也寤而如戒是夕又夢紫衣人杖叩之曰起起舟至矣陳公驚起則已在元帥某舟中蓋公舊所事統領官降於元將憐而載之也將有令毋畱附舟人統領官匿之皇板下取食飲從板隙投之事將洩忽颶風大發將懼甚統領官白公有巫術令出而詛之風果止遂予公飲食送歸揚州公由是棄軍籍避地野貽以巫術行久之生二女其季卽淳皇后也公無子年九



十九始卒洪武二年追封揚王媪爲王夫人立祠太廟東明年有言王墓在盱眙者中都守臣按之信帝乃命中書省卽墓次立廟設祠祭署奉祀一人守墓戶二百一十家世世復而諭翰林學士宋濂文其碑撤太廟東祠

馬公逸其名高皇后父也宿州人爲人任俠負氣元末殺人亾命定遠與郭子興善以季女屬子興後歸太祖卽高皇后也馬公及妻鄭媪皆前卒洪武二年追封徐王媪爲王夫人建祠太廟東皇后親奉安神主祝文稱孝女皇后馬氏謹奉皇帝命致祭四年省祠命禮部尚書陶凱卽宿州瑩次立廟二十五年設祠祭署奉祀祀丞各一人王無後以外親武忠武聚爲之置灑掃戶九十三家永樂七年帝北巡道宿州親

謁祠下守塚武戡爲建陽衛鎮撫犯法逮至責而宥之十五年帝復親祭以戡爲徐州衛指揮僉事先是太祖欲訪后宗族授之官后力辭而止故馬氏無顯者

呂本壽州人懿文太子次妃父也仕元爲元帥府都事後歸太祖授中書省令史出爲湖廣行省照磨洪武三年遷中書右司郎中轉左司五年擢刑部侍郎尋拜吏部尚書六年改太常司卿明年四月御史臺言本奉職不謹方丘牲角非繭栗功臣廟壞不修詔免官罰役功臣廟已釋爲北平按察僉事時並命兵部員外郎楊基爲山西按察副使御史答祿與權爲廣西按察僉事帝召諭之曰風憲之設在肅紀綱清吏治非專理刑名爾等往修厥職務明大體毋倣俗吏拘繩墨



善雖小爲之不已將成全德過雖小積之不已將爲大愆不見于雲之臺由寸土之積燎原之火由一燭之微可不慎哉本等頓首受命尋召爲禮部尚書未幾出爲兩浙都轉運鹽使十二年復授太常司卿逾二年卒無子賜葬鍾山之陰初太祖冊常遇春女爲懿文太子妃洪武七年十月生子雄英又冊本女爲太子妃十年十一月生子允炆卽建文帝明年十一月常妃又生子允熲越十餘日常妃薨呂氏始獨居東宮是時皇太子並置二妃秦王亦納王保保姝爲妃又以鄧愈女爲配皆先代故事所無也

馬全洪武中爲光祿少卿二十八年冊其女爲皇太孫妃太孫嗣位冊爲皇后及都城陷后崩於火全不知所終

張麒永城人洪武中以女爲燕世子妃授兵馬副指揮世子爲太子進京衛指揮使尋卒洪熙元年追封彭城伯諡恭靖後進爲侯二子景昇並昭皇后兄也景從成祖起兵取大寧戰鄭村壩俱有功授義勇中衛指揮同知已援薊州敗遼東軍還佐世子守北平永樂二年遷本衛指揮使三年調金吾右衛五年調錦衣衛景嘗有過成祖戒之曰戚畹最當守法否則罪倍常人汝今富貴能不忘貧賤驕逸何自生若奢傲放縱凌虐下人必不爾恕爾尚慎之景頓首謝十四年調府軍右衛仁宗立擢中軍都督府左都督俄封景彭城伯子孫世襲洪熙改元掌五軍右哨軍馬英宗嗣位年幼太皇太后召景兄弟誠諭之公朝政弗令預景兄弟素恭謹因訓飭益



自斂正統三年長子輔殺養子之久囚者論徒帝特宥之未  
 幾景卒輔病廢子瑾嗣以伯爵封輔命未下而輔卒初景私  
 蓄奄人瑾匿不舉事發下獄已獲釋瑾從弟玘天順中官錦  
 衣衛副千戶飲千戶呂宏家懇留歌妓與宿宏不聽遂抽刀  
 刺宏宏創重死法當斬玘數陳冤乃援議親末減詔不從迄  
 如律成化十六年瑾卒子信嗣信卒子欽嗣欽卒子勳嗣勳  
 卒貧熊嗣熊三傳至曾孫光祖崇禎十七年賊陷京城被殺  
 昇字叔暉成祖起兵昇以舍人守北平有功授千戶永樂三  
 年遷羽林前衛指揮僉事調府軍衛十二年從北征仁宗卽  
 位拜後府都督同知明年宣宗繼統進左都督掌左府事宜  
 德四年二月勅諭昇曰卿舅氏至親日理劇務或以吏欺謾

連不問則廢法問則傷恩其罷府事朝朔望官祿如舊稱朕  
 優禮保全之意九年北征命掌都督府事留守京師英宗立  
 太皇太后令弗預政大學士楊士奇稱昇賢宜加委任太后  
 終不許正統五年兄景已前卒太后念外氏惟昇一人封惠  
 安伯子孫世襲明年卒子軫早亡孫琮嗣琮卒弟瑛嗣瑛卒  
 無子庶兄瓚嗣瓚卒子偉嗣弘治十二年以才充陝西總兵  
 官鎮守固原明年五月孝宗御平臺召大學士劉健等出兵  
 部推舉京營大將疏歷詢偉才命提督神機營御書勅以賜  
 特人異之正德元年令參英國公張懋保國公朱暉提督團  
 營三年加太子太保六年三月充總兵官偕都御史馬中錫  
 督京兵討流賊劉六等偉但擁兵自衛朝議責其玩寇殃民



名還俄御史吳堂劾其罪兵部請逮偉及中錫下獄論死遇赦獲釋停祿閒住十年請給祿爲兵科所駁詔給其半十五年復督神機營世宗嗣位兼提督團營嘉靖二年敘奉迎防守功加太子太傅十四年偉卒贈太傅諡康靖子鏞嗣二十年言官交劾勦戚權豪家置店房科私稅諸罪鏞亦預焉坐輸贖還爵二十七年掌後府事居三年卒子元善嗣隆慶四年僉書後府事萬曆三十七年卒子慶臻嗣四十八年掌左府事崇禎元年九月命提督京營慶臻私請內閣於勅內增入兼管捕營捕營提督鄭其心訂慶臻侵職帝怒詰改勅故大學士劉鴻訓至遣戍而慶臻以世臣止停祿二年後復起掌都督府十七年賊陷都城慶臻召親黨盡散貲財闔家自

燔死南渡時贈太師惠安侯諡忠武合祀旌忠祠初世宗革外戚世爵惟張氏彭城惠安二伯得畱慶臻卒殉國難

胡榮濟寧人洪武中長女入宮爲女官授榮錦衣衛百戶永樂十五年將冊其第三女爲皇太孫妃擢光祿寺卿子安爲府軍前衛指揮僉事專侍太孫不泄事後太孫踐阼妃爲皇后安亦屢進官宣德三年后廢胡氏遂不振

孫忠字主敬鄒平人初名愚宣宗改曰忠兒時遇危疾父夢神告曰帝命我療兒及覺視之口有藥香旣長入國學除介休主簿調永城督夫營天壽山陵有勞遷鴻臚寺序班遷其女入皇太孫宮宣宗卽位冊爲貴妃授忠中軍都督僉事宣德三年皇后胡氏廢貴妃爲皇后封忠爲會昌伯嘗謁告歸



里御製詩賜之命中官輔行比還帝后車駕臨幸慰勞妻董夫人數名入宮賜賚弗絕正統中皇后爲皇太后忠生日太后使使賜其家時王振專權方枷祭酒李時勉於國學忠附奏臣荷恩厚願赦李祭酒使爲臣客坐無祭酒臣不歡太后立言帝時勉乃獲釋忠家奴貸子錢於濱州民規利數倍有司望風奉行民不堪訴諸朝言官交章劾命執家奴戍邊忠不問景泰三年卒忠年八十五贈會昌侯諡康靖英宗復辟加贈太傅安國公改諡恭憲成化十五年再贈太師左柱國子五人繼宗顯宗紹宗續宗純宗純宗官錦衣衛指揮僉事早卒

繼宗字光輔章皇后兄也宣德初授府軍前衛指揮使久之改錦衣衛景泰初進都指揮僉事尋襲父爵天順改元以奪門功進爵爲侯加號奉天翊衛推誠宣力武臣特進光祿大夫柱國身免二死子免死世襲侯爵諸弟官都指揮僉事者俱改錦衣衛俄自言臣與弟顯宗率子壻家奴四十三人預奪門功乞加恩命由是顯宗進都指揮同知子璉授錦衣衛指揮使壻指揮使武忠進都指揮僉事蒼頭輩授官者復十七人五月命督五軍營戎務兼掌後軍都督府事左右又有爲紹宗求官者帝名李賢謂曰孫氏一門長封侯次皆顯秩子孫二十餘人悉得官足矣今又請以爲慰太后心不知初官其子弟請於太后數次後允不懌者累日曰何功於國濫授此秩物盛必衰一旦有罪吾不能庇矣賢頓首頌太后盛



德因從容言祖宗以來外戚不典軍政帝曰初內侍言京營軍非屬皇舅不可故有斯舉太后實悔至今賢曰侯幸淳謹無害但後不可爲例耳帝曰然已錦衣遂杲奏英國公張懋太平侯張瑾及繼宗紹宗並侵官地立私莊命各首實懋等具服帝曰勛戚大臣已享厚祿復爲此法本難貸旣服罪姑宥之典莊者悉執問還其地於官石亨之獲罪也繼宗爲顯宗武忠及子孫家人軍伴辭職帝止革家人軍伴之授職者七人餘皆不問四年繼宗母安國夫人董氏卒年九十二恩恤有加五年曹欽平進太保尋以疾奏解兵柄辭太保不允憲宗嗣位復設十二團營命繼宗提督兼督五軍營帝開經筵命知經筵事修英宗實錄爲監修官朝有大議必繼宗爲

首再覈奪門功惟繼宗侯如故成化初乞休優詔不許二年八月實錄成加太傅九年以四方災傷命停刷卷繼宗借其僚請并停在京者御史楊守隨等言刷卷皆用官錢何病於民何傷於國良由繼宗等平日任情作奸多無案牘懼爲刷卷者所發故妄行瀆奏宜致於法帝不罪十年閏六月兵科給事中章鑑等劾其三宜退言繼宗總司兵柄垂二十年未聞展一籌以禦邊樹一勛以報國尸位素餐懷祿回寵宜亟退以保全終始於是繼宗上疏懇辭帝優詔許解營務仍泄後府事知經筵預議大政繼宗復辭帝不許免其奏事承旨自景帝以前戚畹無典兵者帝見石亨張軌輩以營軍奪門故使親臣參之非故事也又五年繼宗卒年八十五贈郊國



公諡榮襄

吳安丹徒人父彥名有女入侍宣宗於東宮生景帝宣德三年冊爲賢妃時彥名已卒授安錦衣衛百戶景帝嗣位尊妃爲皇太后安進本衛指揮使屢遷前府左都督弟信亦屢擢都督僉事景泰七年加恩舅氏封安安平伯信早亡官其弟敬爲南京前軍左都督英宗復辟太后復稱賢妃降安爲府軍前衛指揮僉事敬及其羣從南京錦衣衛指揮僉事智府軍前衛指揮同知喜山指揮僉事廣林錦衣衛千戶誠俱革職原籍開住尋命安爲錦衣衛指揮使子孫世襲

錢貴海州人英宗睿皇后父也祖整從成祖起兵爲燕山護衛副千戶父通嗣職官至金吾右衛指揮使貴嗣祖職數從

成祖宣宗北征屢遷都指揮僉事正統七年后將正位中宮擢貴中府都督同知英宗數欲封之后輒遜謝故后外家獨不獲封貴卒長子欽爲錦衣衛指揮使與弟鍾俱歿於土木欽無子鍾遺腹子雄爲之後年幼以父錦衣故秩予優給天順改元擢本衛都指揮使貴妻陳氏后生母也訴貴弟禮欺雄孤弱使酒忿詈乞勅歸南京守祖墓母使爲國戚玷詔錦衣衛執問之雄尋擢都督同知成化時后崩憲宗優生母外家周氏而薄錢氏故后家亦不獲封雄卒子承宗亦屢官錦衣都指揮使弘治二年四月承宗祖母王氏援憲宗外家王氏例請封吏部爲覆請乃封承宗安昌伯世襲先是勛臣莊田命有司代收其稅至是王氏乞自收乃命通行府州縣願



自收者聽而禁管莊者橫肆嘉靖五年承宗卒諡榮僖子維圻嗣尋卒承宗母請以庶長子維垣嗣詔授錦衣衛指揮使已又請嗣伯爵世宗以外戚世封非祖制下廷臣議八年十月上議曰祖宗之制非軍功不封洪熙時都督張景始以外戚封彭城伯其弟昇亦以都督乞封惠安伯外戚之封自此始其後侯孫忠周壽王源伯周彧王清王濬皆援張景例又其後伯錢承宗公張鶴齡復援王源例循習至今有一門而並公侯者有一時而並侯伯者有兄弟三人而並三侯伯者爵賞無章歲糜厚祿襲開國靖難之勛封者不滿五十人未幾罷去者十有九人後雖收錄不過指揮彼託屬掖廷一門數貴而傳襲三四世不已踰分乎臣等謹議魏定二公雖係

戚里實佐命元勛彭城惠安二伯卽以恩澤封而軍功參半其餘外戚恩封襲者宜終其身毋得請襲有出特恩一時寵錫者量授指揮千百戶之職終其身有妄引洪熙以後例上請者聽吏部科道官糾彈置之重典以爲貪冒不知止者之戒世宗俞其議命魏定彭城惠安襲封如故餘止終本身著爲令維垣遂不得襲以錦衣終

汪泉世爲金吾左衛指揮使家京師正統十年其子瑛有女將冊爲郕王妃乃授瑛爲中城兵馬司指揮食祿不視事妃正位中宮進泉都指揮同知府軍衛帶俸瑛錦衣衛指揮使泉瑛尋擢左都督瑛弟亦授錦衣千戶有差英宗復位泉仍居金吾舊職瑛錦衣舊職其四弟皆奪官還故里尋命瑛錦



衣指揮僉事子孫世襲

杭昱女爲景帝妃生子見濟景泰三年帝欲廢英宗子而立巳子乃廢皇后汪氏冊妃爲后昱累官錦衣衛指揮使兄聚授錦衣千戶聚尋卒賜賻及祭葬七年后崩官其弟敏錦衣百戶英宗復辟盡奪景帝所授外親官尤惡杭氏昱巳前卒敏削職還里

周能字廷舉昌平人女爲英宗貴妃生憲宗是爲孝肅皇太后英宗復位見能於便殿授錦衣衛千戶賜賚甚渥能卒長子壽嗣職憲宗踐阼擢左府都督同知成化三年封慶雲伯贈能慶雲侯壽以太后弟頗恣橫時方禁勛戚請乞莊田壽獨冒禁乞通州田六十二頃憲宗不得已與之嘗奉使道呂

梁洪多挾商艘十事謝敬不可壽與閔且劾之敬坐落職十七年進爵爲侯其子弟同日授錦衣官者七人能追贈太傅寧國公諡榮靖孝宗嗣位加太保時壽所賜莊田甚多其在寶坻者已得五百頃又欲得其餘七百餘頃詭言以私財相易部劾其貪求無厭執不許孝宗竟許之又與建昌侯張延齡爭田兩家奴相毆致交章上聞爭不已又數撓鹽法侵公家利有司厭苦之十六年加太傅弟長寧伯彧亦加太保兄弟並爲侯伯位三公前此未有也武宗立法傳奉官壽子姪錦衣衛指揮使瑾等八人亦在汰中壽上章乞留從之以正德四年卒贈寧國公諡恭和子瑛嗣封殖過於父嘉靖中於河西務設肆邀商貨虐市民虧國課爲御史巡按者所劾停



祿三月而瑛怙惡如故又爲主事翁萬達所劾詔革其廕肆下家人於法司時已革外戚世爵瑛卒遂不得嗣

或太后仲弟也初官錦衣衛指揮使成化十七年擢左府都督同知二十一年封長寧伯世襲弘治中外戚競營私利或與壽寧侯張鶴齡至聚衆相鬪都下震駭九年九月尚書屠瀟偕九卿上言曩憲宗皇帝詔勸戚之家不得占據關津陂澤設肆列廛侵奪民利違者許所在官司執治以聞皇上踐極亦惟先帝之法是訓是遵而勸戚諸臣不能恪守先詔縱令家人列肆通衢邀截商貨都城內外所在有之睹永樂間榜例王公僕從二十人一品不過十二人今勸戚多者以百數大乖舊制其間多市井無賴冒名罔利利歸羣小怨叢一

身非計之得邇者長寧伯周或壽寧侯張鶴齡兩家以瑣事忿爭喧傳都邑上徹宸居失戚里之觀瞻損朝廷之威重伏望皇上綸音戒諭俾各修舊好毋間親義凡有店肆悉皆停止更勅都察院揭榜禁戒有勸戚家人擾害商賈侵奪民利者聽巡城巡按御史及所在有司執治仍考永樂間榜例裁定勸戚家人不得濫收時科道亦以爲言帝嘉納之十八年進太保或求爲侯吏部言封爵出自朝廷無請乞者乃止武宗立悉擢或子瑋等六人爲錦衣官尋卒傳子瑋孫大經及曾孫世臣嘉靖二十八年降授錦衣衛指揮同知先是周太后有弟吉祥兒時出遊去爲僧家莫知所在太后久忘之矣一夕夢神言后弟宿報國寺伽藍殿小寺中英宗夢亦如之



旦遣小黃門以夢求果得吉祥太后與之言而泣欲爵之不  
可厚賜遣還寺憲宗立爲建大慈仁寺賜莊田數百頃其後  
周氏衰落惟吉祥寺田久猶存

王鎮字克安上元人憲宗純皇后父也憲宗嗣位冊后爲妃  
授鎮金吾左衛指揮使未幾后將正位中宮拜中軍都督同  
知成化四年進右都督鎮爲人厚重清謹雖居榮寵不改其  
素人稱長者十年六月卒弘治五年追封阜國公諡康穆子  
三人源清濬源字宗本后弟也父卒授錦衣衛都指揮使外  
戚例有賜田源已獲賜又多侵民業十六年夏爲六科給事  
中王垣等所劾言戶部郎中張禎叔等奉命按視靜海縣外  
戚所占田及其家奴怙勢害民諸事已皆得實竊惟永樂宣

德間許畿輔八郡民盡力墾荒永免其稅所以培國本重王  
畿萬世子孫當遵守也外戚王源賜田初止二十七頃版冊  
昭然乃令其家奴別立四至占奪民產至二千二百二十頃  
有奇可耕者三百六十六頃中多貧民成熟之地朝廷因其  
請乞并以賜之及貧民赴告下御史劉喬覆按喬徇情曲奏  
致源無忌憚家奴益橫今禎叔等再按得實乞自二十七頃  
之外悉還民并治喬欺罔罪帝不悅切責之後詔禁外戚侵  
民產源乃悉以所占歸舊主人謂其能補過十八年擢中軍  
都督同知二十年封瑞安伯弘治五年進侯十六年加太保  
武宗登極加太傅屢增祿至七百石源躬長者行不媿其父  
以嘉靖三年卒贈太師諡榮靖子橋嗣伯爵後以例革



清亦后弟成化十八年授錦衣衛千戶久之進本衛指揮使再進中軍都督同知弘治六年封崇善伯武宗嗣位加太保以嘉靖十三年卒子極以例降錦衣指揮同知

濬以成化十八年授錦衣衛百戶兄清擢指揮使濬代爲千戶及清擢都督濬復代爲指揮使清封伯濬卽拜中軍都督同知尋進右都督武宗踐阼轉左都督正德二年封安仁伯踰月卒贈侯濬兄弟三人並貴顯皆謙慎守禮在戚里中以賢稱子桓嗣爵後革

萬貴憲宗萬貴妃之父也以妃父歷官錦衣衛指揮使貴頗謹飭每受賜輒憂形於色曰吾起掾史編尺伍蒙天子恩備戚屬子姓皆得官福過災生未知稅駕矣時貴妃方擅寵貴

子喜爲指揮使通爲正千戶達爲副千戶並驕橫貴每見諸子屑越賜物輒戒曰官所賜皆著籍他日復宣索汝曹無以應矣諸子皆笑以爲迂成化十年卒賻贈祭葬有加十四年進喜都指揮同知通指揮使達指揮僉事通少貧賤業賈旣驟貴益貪無賴子爭附之誘以作奸犯科造奇巧邀利中官韋興梁芳等復爲左右每進一物輒傾內庫償輦金錢絡繹不絕通妻王出入宮掖大學士萬安附通爲同宗婢僕朝夕至王所謁起居妖人李孜省輩皆緣喜進朝野因是匱乏通死帝眷萬氏不已遷喜都督同知達指揮同知通庶子從喜方二歲養子牛兒方四歲俱授官憲宗崩言官劾其罪狀孝宗乃奪喜等官而盡追封誥及內帑賜物如貴言



邵喜昌化人世宗大母邵太后弟也世宗立封喜昌化伯明年卒子蕙嗣五年卒無子族人爭嗣初太后入宮時父林早歿太后弟四人宗安宣喜宗宣皆無後及蕙卒帝令蕙弟萱嗣蕙姪錦衣指揮輔千戶茂言萱非嫡派不當襲蕙母何爭之議久不決大學士張璁等言邵氏子孫已絕今其爭者皆旁枝不宜嗣時帝欲為喜必置後乃以喜兄安之孫杰為昌化伯明年明倫大典成命武定侯郭勛頒賜戚畹弗及杰杰自請之帝詰勛怒錄邵氏爭襲章奏訐杰實他姓請覆勘帝不聽會給事中陸粲論大學士桂萼受杰賂使奴隸冒封爵帝怒下粲獄而盡革外戚封杰亦奪襲

張巒敬皇后父也孝宗卽位封壽寧伯立皇太子進為侯卒

贈昌國公子鶴齡嗣其弟廷齡亦由建昌伯進為侯是時帝遇外家厚皇后復為之內主巒起諸生雖貴盛能敬禮士大夫鶴齡兄弟並驕肆縱家奴奪民田廬篡獄囚數犯法帝遣侍郎屠勳太監蕭敬按得實坐奴如律敬復命皇后怒帝亦佯怒已而召敬曰汝言是也賜之金給事中吳世忠主事李夢陽皆以劾廷齡幾得罪他日帝遊南宮鶴齡兄弟入侍酒半皇后皇太子及鶴齡母金夫人起更衣因出遊覽帝獨召鶴齡語左右莫聞也遙見鶴齡免冠首觸地自是稍斂迹正德中鶴齡進太傅世宗入繼鶴齡以定策功進封昌國公時敬皇后已改稱皇伯母昭聖皇太后矣帝以太后抑蔣太后故銜張氏嘉靖十二年廷齡有罪下獄坐死并革鶴齡爵謫



南京錦衣衛指揮同知太后爲請不得初正德時日者曹祖子鼎爲延齡奴言祖傳六甲六丁神術能役鬼兵後祖父子相忿詈祖被延齡逐遂告延齡與其子鼎等謀不軌武宗下祖等獄將集羣臣廷鞫之祖一夕仰藥死時頗以祖暴死疑延齡提牢主事及司獄官皆得罪而獄無左證遂解延齡屬天文生董景爲草奏辭爵不允事幾二十年矣指揮司聰者爲延齡行錢負其五百金索之急遂與景子至謀訐祖往日所首事至陰以聰奏草脅延齡賄延齡乃執榜聰幽殺之令聰子昇焚其屍而折所負券昇噤不敢言常憤詈至至念昇讐已慮他日事必發乃摭聰前奏上之下刑部逮延齡及諸奴雜治延齡嘗買沒官第宅造園池僭侈踰制又以私憾殺

婢及僧事并發覺刑部治延齡謀不軌無驗而違制殺人皆實帝猶謂尚書聶賢故輕之奪其俸延齡遂論死繫獄四年獄囚劉東山發延齡手書中有君道賞罰不明六字東山復陰構奸人劉琦誣延齡盜宮禁內帑兩人所告連數十百人延齡復加訕上罪繫如故東山罪當戍以此得免明年奸人班期于雲鶴又告鶴齡兄弟挾左道祝詛辭及太后鶴齡自南京赴逮瘐死獄中期雲鶴亦坐誣謫戍又明年東山以射父亾命爲御史陳讓所捕獲復誣告延齡如期雲鶴指并構讓及遂安伯陳鏞西寧侯宋良臣京山侯崔元太監麥福等數十人冀以悅上意而脫已罪奏入下錦衣衛窮治讓獄中上疏言東山扇結奸黨圖危宮禁陛下有帝堯旣睦之德而



東山敢爲陛下言漢武巫蠱之禍陛下有帝舜底豫之孝而東山敢導陛下以暴秦遷母之謀離間骨肉背逆不道義不可赦疏奏帝頗悟指揮王佐典其獄鉤得東山情奏之乃械死東山赦讓鍾等而延齡以前罪長繫後四年太后崩崩後五年延齡斬西市

夏儒毅皇后父也正德中以后父封慶陽伯爲人長厚父瑄疾三年不去左右旣貴服食如布衣時見者不知爲外戚也以壽終子臣嗣伯嘉靖八年罷襲

陳萬言肅皇后父也大名人起家諸生嘉靖元年授鴻臚卿改都督同知賜第黃華坊明年復詔營第於西安門外費內帑金數十萬工部尚書趙璜以西安門近大內治第母太高

帝怒逮營繕郎翟璘下獄言官余瓚等諫不省尋封萬言奉和伯子紹祖授尚寶司丞又明年萬言乞武清東安地各千頃爲莊田詔戶部勘閒地給之給事中張漢卿言萬言拔跡儒素聯婚天室當躬自檢飭爲戚里倡而僭冒陳乞違越法度去歲浚冬沍雪急起大第徒役疲勞怨咨載路方今災沴相繼江淮餓死之人掘穴掩埋動以萬計萬言曾不動念益請莊田小民一厘一畝終歲力作猶不足於食若又割而畀之貴戚欲無流亾不可得也伏望割恩以義杜漸以法一切裁抑令保延爵祿帝竟以八百頃給之巡撫劉麟御史任洛復言不宜奪民地弗聽七年皇后崩萬言亦絀十四年卒子不得嗣封



方銳世宗方皇后父也應天人后初爲九嬪銳授錦衣正千戶嘉靖十二年張后廢后由嬪冊爲皇后遷銳都指揮使扈蹕南巡道拜左都督既封安平伯尋進封侯卒子承裕嗣隆慶元年用主事郭諫臣言罷襲

陳景行穆宗繼后陳皇后父也其先建昌人高祖政以軍功世襲百戶調通州右衛遂家焉景行故將門獨嗜學弱冠試諸生高等穆宗居裕邸選其女爲妃授景行錦衣千戶隆慶改元封固安伯景行素恭敬每遇遣祀冊封諸典禮必齋戒將事家居誠諸子以退讓萬曆中卒太后帝及中宮潞王公主賻贈優厚人皆榮之子昌言嘉言善言名言皆官錦衣名言妻莊皇后女弟也景行卒昌言已死昌言子承恩引李文

全例請襲祖封帝曰承恩景行孫非文全比也以都督同知授之後文全子銘誠復侯

李偉字世奇神宗生母李太后父也灤縣人兒時嬉里中有羽士過之驚語人曰此兒骨相當位極人臣嘉靖中偉夢空中五色彩輦旌幢鼓吹導之下寢所已而生太后避警攜家入京師居久之太后入裕邸生神宗隆慶改元立皇太子授偉都督同知神宗立封武清伯再進武清侯太后能約束其家偉嘗有過太后召入宮跪而切責之不以父故翫祖宗法以是偉益小心畏慎有賢聲萬曆十一年卒贈安國公諡莊簡子文全嗣侯卒子銘誠嗣侯天啟末銘誠頌魏忠賢功德建祠名鴻勛莊烈帝定逆案銘誠幸獲免久之大學士薛國



觀請勒勛戚助軍餉首及武清詔借四十萬銘誠不能應官督之急銘誠死督其子國安國安死繫其家人國安女字嘉定伯周奎孫奎請於莊烈后后曰但迎女秋毫無所取可也奎從之諸戚畹人人自危會皇五子疾亟李太后憑而言帝懼悉還李氏產復武清爵而皇五子竟殤或云中人構乳媪教皇五子言之也

王偉神宗顯皇后父也萬曆五年授都督尋封永年伯帝欲加恩偉子棟及其弟俊閣臣請俱授錦衣正千戶帝曰正德時皇親夏助等俱授錦衣指揮使世襲今何薄也大學士張居正等言世襲有祖制在臣不敢奉詔正德時例世宗悉已釐革請授棟錦衣衛指揮僉事俊千戶如前議帝意猶未慊

居正固奏乃止

鄭成憲神宗鄭貴妃父也貴妃有寵鄭氏父子宗族並驕恣帝悉不問成憲累官至都督同知卒子國泰請襲帝命授都指揮使給事中張希臯言指揮使下都督一等不宜授任子妃家蒙恩如是何以優后家不報是時貴妃謀奪嫡廷臣交爭俱指斥鄭氏國泰不自安乃上疏請立太子其從子承恩亦言儲位不宜久虛大學士沈一貫左右於帝弗聽詔奪國泰俸而斥承恩爲民然言者終不息萬曆二十六年承恩復上疏劾給事中戴士衡知縣樊玉衡妄造憂危竝議離間骨肉汚鱗皇貴妃帝怒憂危竝議者不知誰所作中言侍郎呂坤構通宮掖將與國泰等擁戴福王而士衡前嘗論坤與承



恩相結玉衡方抗言貴妃沮立太子疏並留中故承恩指兩人帝怒士衡玉衡皆永戍廷臣益忿鄭氏久之皇太子立四十三年男子張差入東宮被擒言者皆言國泰謀刺皇太子主事王之案鞫差差指貴妃宮監主事陸大受給事中何士晉遂直攻國泰帝以貴妃故不欲竟御史劉廷元亦先以差風癩聞國泰遂得免事詳之案等傳或謂國泰厚賄大學士方從哲及廷元等故獄辭多頗云國泰官左都督病死子養性襲爲都督天啟初光祿少卿高攀龍御史陳必謙追論其罪且言養性結白蓮賊將爲亂詔勒養性出京師隨便居住魏忠賢用事宥還

王昇熹宗生母王太后弟也父鉞天啟元年封新城伯尋以

皇子生進侯卒子國興嗣崇禎十七年京師陷見殺

劉文炳字淇筠宛平人大父應槐娶徐氏生女入宮卽莊烈帝生母孝純皇太后帝卽位封太后弟效祖新樂侯崇禎七年卒文炳嗣侯八年文炳大母徐太夫人年七十賜寶鈔白金文綺帝謂內侍曰太夫人年老猶聰明善飯使太后在不知若何稱壽也因泣下愴然者久之宮中奉太后像或曰未嘗帝不憚遣司禮監太監王裕民同武英殿中書至文炳第勅徐口授繪像以進左右咸驚曰肖帝大喜命卜日具鹵簿帝俯伏歸極門迎入安奉奉慈殿朝夕上食如生因追封應槐瀛國公徐氏瀛國太夫人文炳晉少傅叔繼祖弟文耀文照俱晉爵有差文炳母杜氏甚賢每謂文炳等曰吾家無功



德直以太后故受此大恩柰何不盡忠報天子文炳等叩頭  
曰謹受教帝遣文炳視祖陵鳳陽密諭有大事上聞文炳歸  
奏史可法張國維兩人忠正有方畧第久任用必能爲陛下  
滅賊後兩人果殉國難文炳謹厚不妄交獨與宛平太學生  
申湛然布衣黃尼麓及駙馬都尉鞏永固善時天下多故流  
賊勢益張文炳與尼麓等請明忠義爲守禦計及李自成據  
三秦破榆林將引兵犯京師文炳知勢不支慷慨泣下謂永  
固曰國事至此我與公受國恩當以死報十七年正月帝召  
文炳永固等問國事二人請早建藩封遣永固二王之藩帝  
是之以內帑乏不果行時自成已出陝西蹂河東陷太原寧  
武宣大三月初一日賊警益急命文武勦賊分守京城繼祖

守皇城東安門文耀守永定門永固守內城崇文門文炳以  
繼祖文耀皆守城故未有職事十六日賊攻西直門勢益急  
尼麓踉蹌至謂文炳曰城將陷君宜自爲計文炳母杜氏聞  
之卽命侍婢簡笥絛於樓上作七八縵命家僮積薪樓下隨  
遣老僕鄭平迎李氏吳氏二女歸曰吾母女同死此又念瀛  
國太夫人年篤老不可俱燼因與文炳計匿之申湛然家十  
八日帝遣內使密召文炳永固文炳歸白母曰有詔召兒兒  
不能事母母拊文炳背曰太夫人旣得所我與若妻妹死耳  
復何憾遂偕永固謁帝時外城已陷帝曰二卿所糾家丁能  
巷戰否文炳以衆寡不敵對帝愕然永固奏曰臣等已積薪  
第中當闔門焚死以報皇上帝曰朕志決矣朕不能守社稷



朕能死社稷兩人皆涕泣誓効死出馳至崇文門須臾賊大至永固射賊文炳助之殺數十人各馳歸第十九日文照方侍母飯家人急入曰城陷矣文照盥脫地直視母母遽起登樓文照及二女從之文炳妻王氏亦登樓懸孝純皇太后像母率眾哭拜各縊死文照入纒墮拊母背連呼曰兒不能死矣從母命留侍太夫人遂逃去家人共焚樓文炳歸火烈不得入入後園適湛然尼麓至曰鞏都尉已焚府第自刎矣文炳曰諾將投井忽止曰戎服也不可見皇帝湛然脫已幘冠之遂投井死繼祖歸亦投井死繼祖妻左氏見大宅火知賊已入亟登樓自焚妾董氏李氏亦焚死初文燿見外城破突出至渾河間內城破復入見第焚大哭曰文燿未死以君與

母在今若此生何爲遂覓文炳死所大書版井旁曰左都督劉文燿同兄文炳畢命報國處亦投井死闔門死者四十二人而是時惠安伯張慶臻集妻子同焚死新城侯王國典亦焚死宣城伯衛時春懷鐵券闔門赴井死與永固射賊楊光陞者駙馬都尉子也被甲馳突左右射與永固相失矢盡投觀象臺下井中死而湛然以匿瀛國太夫人爲賊所拷掠終不言體糜爛以死

張國紀祥符人熹宗張皇后父也天啟初封太康伯魏忠賢與客氏忌皇后因謀陷國紀使其黨劉志選梁夢環先後劾國紀謀占宮婢韋氏矯中宮旨鬻獄忠賢將從中究其事以撼后大學士李國楫曰君后猶父母也安有勸父構母者國



紀始放歸故郡忠賢猶欲擒之莊烈帝立乃得免崇禎末以輸餉追爵為侯旋死於賊

周奎蘇州人莊烈帝周皇后父也崇禎改元封嘉定伯賜第於蘇州之葑門帝嘗論奎及田貴妃父弘遇袁貴妃父祐宜恪遵法度為諸戚臣先祐頗謹慎惟弘遇驕縱奎居外戚中碌碌而已李自成逼京師帝遣內侍徐高密論奎倡助戚輸餉奎堅謝無有高憤泣曰后父如此國事去矣奎不得已奏捐萬金且乞皇后為助及自成陷京師掠其家得金數萬計自成去奎降於我

大清

明史彙

列傳第一百七十七終

明史彙

列傳第一百七十八

光祿大夫 經筵講官明史總裁戶部尚書加七級臣王鴻緒奉

敕編撰

宦官上

鄭和

侯顯

金英典安

范弘王瑾

王振

曹吉祥

懷恩覃吉

汪直

梁芳

錢能

何鼎

李廣

蔣琮

劉瑾

谷大用

張忠

張雄

張銳

劉允



嗚呼宦寺之禍由來烈矣張趙隕漢田楊亂唐童梁禍宋顛覆之轍異代同途明太祖懲前代之失嚴設法禁雖置各監局以處寺人而定制不兼文武銜不侵外庭政不御外臣冠服且嘗語侍臣曰此曹給事宮掖母得典兵預政命立鐵牌樹之宮門有言政事者卽日斥遣嗚呼子孫率是制也禍敗焉自而興建文帝御內豎無恩燕師逼江北多逃入其軍漏朝廷虛實成祖以爲忠於已也卽位以後頗加委任旣而監軍出使將兵分鎮多以命之至令建東廠刺外事心營攸寄遂爲厲階黃儼江保幾危太子交阯于敵禍由馬騏中官之患由此始矣初太祖不許內侍讀書識字後宣宗設內書堂令翰林官二三員爲教習由是此輩多通文墨曉古今遂其

智巧逢君作奸爲患益大正統之王振成化之汪直正德之劉瑾天啟之魏忠賢小者毒痛縉紳大者傾危宗社馴至末季杜勳曹化淳之徒開闢啟城率先迎賊遂底滅亾追維禍源不能不歎息於永宣之觴濫也夫英宗蒙塵沙漠復辟伊始遽寵吉祥孝宗希蹤文景羣賢滿朝猶惑李廣神宗黜保屏鯨而礦稅之使旋出莊烈帝親定逆案而總理監視薨然朋興蓋朝夕左右是非浸潤易惑難拔至於如此惟世宗盡撤天下鎮守內臣及典京營督倉場者終其世四十餘年宦官不敢爲惡然則整飭宮庭固尙英斷乎哉或謂宦官孔多非盡不肖如懷恩李芳鄭和張永何鼎王安王承恩方正化輩或鯁直著稱或功名自奮或與國俱亾殆亦呂強張承業



之流亞歟然利一害百靡補喪敗作宦官傳

鄭和雲南人世所謂三保太監者也初事燕王於藩邸從舉兵有功累擢太監有智畧知兵習戰帝疑建文帝遁海外欲蹤跡之且欲耀兵異域示中國富强乃命和及其儕王景弘等通使西洋造大舶修四十四丈廣十八丈齎金銀珠寶幣帛以永樂三年六月統將士二萬七千八百餘人大舶六十二自蘇州劉家河泛海至福建復自福建五虎門揚帆首達占城以次遍歷諸蕃國頌天子詔宣示威德因給賜其君長及諸大臣不服則以武懾之五年九月和等還諸國使者隨和朝見和獻所俘舊港賊首帝大悅爵賞有差舊港者故三佛齊國也其酋陳祖義兇暴剽掠商旅和使使招諭祖義詐

降而潛謀邀劫和覺預爲備祖義率衆至大敗被擒衆五千盡馘至是獻俘詔戮於都市六年九月復命和偕景弘等往賚諸國諸國皆恭順如初獨錫蘭山國王亞烈苦奈兒侮慢不敬謀殺和和覺而去及和歸復經其地遂誘和至國中索金幣不得則潛遣兵五萬餘馳劫和舟而伐木拒險絕和歸路和謂其下曰賊大衆旣出國內虛且謂我軍孤不能戰出其不意反襲之可得志不然吾屬無噍類矣衆然之乃遣人由他道至舟令盡力固拒而躬率所統二千餘人疾馳攻破其城生擒亞烈苦奈兒及其妻子官屬劫和舟者聞之急還城官軍復大破之全師而還九年六月獻俘於朝帝赦不誅釋歸國更立其國之賢者海外諸邦益服中國威德是時交



陞已破滅郡縣其地諸邦益震讐來者日多十年十一月復命和等往使至蘇門答刺既頒賜其王宰奴里河必丁而其前僞王子蘇幹刺者方謀弑主自立且怒和賜不及已率兵數萬邀擊官軍和率衆及其國兵與戰賊敗奔追禽之喃渤利并俘其妻子以十三年七月還朝帝大喜誅蘇幹刺賚諸將士有差十四年冬滿刺加古里等十九國咸遣使朝貢辭還復命和等偕往賜其君長和將命絕域三擒賊魁威震海外凡所號令罔敢不服從而番人利中國貨物益互市通商往來不絕十七年七月和等還京十九年春阿丹祖法兒等十六國朝貢將還帝復命和同往明年八月和等還以其貢使來二十二年正月舊港會長施濟孫請襲宣慰使職命和

齋勅印往賜之比還而成祖已晏駕洪熙元年二月仁宗命和以下番諸軍守備南京南京設守備自和始也宣德五年六月帝以踐阼歲久而諸番國遠者猶未朝貢議復遣使頒詔行賞仍命和偕王景弘往乃復歷忽魯謨斯等十七國而還和經事三朝先後七奉使所歷占城瓜哇眞臘舊港暹羅古里滿刺加渤泥蘇門答刺阿魯柯枝大葛蘭小葛蘭西洋瑣里瑣里加異勒阿撥把丹南巫里甘把里錫蘭山喃渤利彭亨急蘭丹忽魯謨斯比刺溜山孫刺木骨都東麻林刺撒祖法兒沙里灣泥竹步榜葛刺天方黎伐那孤兒凡三十餘國自古奉使絕徼擒王摧敵數建奇勲未有若和之盛者也自宣德以還聲教漸不及遠殊方時有至者要不如永樂時



而和亦老且死不復能奉使矣自和後凡將命海表者莫不盛稱和以夸外蕃故俗傳三保太監下西洋爲明世盛事云時中官有劉永誠者永樂中爲偏將累從成祖北征宣德正統中再擊兀良哈後監鎮甘涼戰沙漠有功景泰末掌團營英宗復辟勒兵從官其嗣子聚錦衣僉事成化時歿聚後以征西功封寧晉伯

侯顯永樂初爲司禮少監帝聞烏思藏僧尙師哈立麻有道術善幻化欲致一見因通迤西諸蕃乃命顯齋書幣往迓選壯士健馬護行元年四月奉使陸行數萬里至四年十二月始與其僧偕來詔駙馬都尉沐昕迎之帝延見奉天殿寵賚優渥儀仗鞍馬什器多以金銀爲之道路烜赫五年二月建

普度大齋於靈谷寺爲高帝高后薦福或言卿雲天花甘露甘雨青鳥青獅白象白鶴及舍利祥光連日畢見又聞梵唄天樂自空而下帝益大喜廷臣表賀學士胡廣等咸獻聖孝瑞應歌詩乃封哈立麻萬行具足十方最勝圓覺妙智慧善普應祐國演教如來大寶法王西天大善自在佛領天下釋教給印誥制如諸王其徒三人亦封灌頂大國師再宴奉天殿顯以奉使勞擢爲太監六年正月始遣中官送哈立麻歸後帝聞西僧尙師昆澤思巴亦有道術徵至京禮而封之與哈立麻亞由是諸藏僧徒絡繹奉貢封王者五封大國師國師者不可悉數其徒利中國財物益往來不絕有司供億車馬入徒西鄙爲告病時鄭和已下西洋傳安陳誠已通西域



獨西番尼八刺地湧塔二國未通聲教并欲臣服之十一年春命顯齋勅行頒賜其君長尼八刺王沙的新葛大喜遣使隨顯入朝表貢方物詔封國王賜誥印十三年七月帝欲通榜葛刺諸國復命顯率舟師以行其國卽東印度之地去中國絕遠其王賽弗丁禮使者甚恭旋遣使貢麒麟及諸方物帝大悅錫予有加榜葛刺之西有國曰沼納樸兒者地居五印度中古佛國也其王亦不刺金數舉兵相侵賽弗丁懼使使告於朝十八年九月命顯往賜金幣諭令罷兵亦不刺金聽命帝廣通四裔奉使者多用中貴西洋則鄭和王景弘西域則李達迤北則海童而西番多以屬顯宣德二年二月宣宗以初登大寶未嘗通使外裔遣顯賜諸番并及尼八刺地

湧塔二國顯遍歷烏斯藏必力工瓦靈藏思達藏頒賜闡化闡教贊善輔教四主及二國君長而還途遇寇劫督將士力戰多所斬獲還朝錄功陞賞者四百六十餘人顯有才辨強力敢任五使絕域未嘗辱命威名與鄭和亞

金英者宣宗朝司禮太監也親信用事宣德七年賜英及范弘免死詔辭極褒美英宗立與興安竝貴幸其後王振擅權英不敢與抗正統十四年夏旱命英理刑部都察院獄囚築壇大理寺英張黃蓋中坐尙書以下左右列坐自是六年一審錄制皆如此九卿抑於內臣之下議者非之其秋英宗北狩甲外大震邸王使英安等召廷臣問計侍讀徐理倡議南遷安叱之令扶理出大言曰敢言遷者斬遂入告太后勸邸



王任于謙治戰守或曰叱咤者英也王卽帝位也先入寇至德勝帝勅安與李永昌同于謙石亨總理軍務永昌亦司禮近侍也景泰元年十一月英犯賊罪下獄論死帝令禁錮之終景帝世廢不用獨任安也先遣使議和請迎上皇朝議報使帝不憚令安出呼羣臣曰公等欲報使孰可者孰爲文天祥富弼詞色交厲尙書王直面折之安始語塞及遣都給事中李實往勅書不及迎上皇實驚走白內閣遇安安復詎曰若奉黃紙詔行耳他何預若事及易儲人遂疑安預謀矣安知于謙賢力護之謙嘗病須竹瀝安勸帝幸萬歲山伐竹賜之或言太過安曰爲國分憂如于公者寧有二人英宗復辟盡磔景帝所用太監王誠舒良張永王勤等謂其與王竑構

邪議易太子且與于謙王文謀立外藩於是給事御史皆言安與誠良等爲黨明知逆謀不諫沮首鼠觀望宜與誠良同罪帝宥之但奪其職任是時中官坐誅者甚衆安僅獲免云安溺奉釋教臨歿遺命舂骨爲灰以供浮屠

范弘交陞人初名安永樂中英國公張輔平黎季犛以交童之美秀者還選爲奄弘及王瑾阮安阮浪等與焉旣長占對嫺雅成祖愛之教令讀書遂博涉經史善筆札侍仁宗於東宮歷長隨奉御宣德改元金英薦之宣宗爲易名累遷司禮太監尋偕英受免死詔又偕英及御用太監王瑾同賜銀記正統時英宗眷弘嘗目之曰蓬萊吉士弘因以自號十四年從征歿於土木喪歸葬香山永安寺弘建也而王瑾至景泰



時始卒瑾初名陳蕪宣宗爲皇太孫時朝夕給事及卽位賜姓名從征漢王高煦還參預四方兵事賞賚累巨萬數賜銀記曰忠肝義膽曰金貂貴客曰忠誠自勵曰心跡雙清又賜以兩宮人官其養子王椿其受寵眷英弘莫逮也阮安奉成祖命營北京城池宮殿及百司府廨日量意營悉中規制工部奉行而已正統時重建三殿治楊村河並有功景泰中復治張秋河道卒囊無十金阮浪至景帝時始爲御用監少監英宗居南宮浪入侍賜鍍金繡袋及鍍金刀浪以贈門下皇城使王瑤瑤飲錦衣衛指揮盧忠所忠險人也見袋刀異常製醉瑤而竊之攜告尚衣監高平平令校尉李善上變言浪傳上皇命送瑤袋刀使結中外應謀復位景帝怒下浪瑤詔

獄忠證之浪瑤皆磔死詞終不及上皇英宗復辟思爲柳州衛千戶平以太監鎮守寧夏帝特遣人收磔之贈浪太監自弘以下四人皆產自絕域入侍內廷然禍福迥絕瑾遭際貴顯旣卒僉從咸賜官爵秩民間慕之遂多腐身薰子者

王振蔚州人少選入內書堂侍英宗東宮爲局郎初太祖禁中官預政自永樂後漸加委寄然犯法輒置極典宣宗時袁琦令阮巨隊等出外採辦覺琦磔死巨隊等駢斬西市又廉裴可烈等不法立誅之命司禮監王瑾榜諭諸中官中官以是畏法及英宗立年少振狡黠得帝權遂越金英等數人掌司禮監以帝未習政事慮文臣欺蔽勸帝用重典於是大臣下獄者不絕而振亦因以市權然是時太皇太后賢方委政



內閣楊士奇楊榮楊溥振心憚之未敢逞至正統七年太皇太后崩榮已先卒士奇以子稷論死不出溥老病僅能畫諾新閣臣馬愉曹鼐勢輕振遂跋扈不可制作大第皇城東建智化寺窮極土木之工興麓川之師委任王驥西南騷動侍講劉球諫不聽因雷震球復應詔陳得失語刺振振下球獄使指揮馬順支解之大理少卿薛瑄祭酒李時勉素不禮振振撫他事陷瑄幾死時勉至荷校國子監門御史李鐸巡光祿遇振不跪請戍鐵嶺衛駙馬都尉石璟詈其家奄振怒其賤已同類下璟獄惡霸州知州張需禁飭牧馬校卒逮之并坐需舉主王鐸又械戶部尚書劉中敷侍郎吳璽陳瑞於長安門所忤恨輒加罪謫內侍張環顧忠錦衣衛卒王永心不

平以匿名書暴振罪狀事發磔於市不覆奏武功衛指揮使華嵩與振姪爭娼當杖贖特命髡其首漆之枷教坊門充大同衛軍帝方以天下事聽振威福刑賞莫由朝廷公侯勳戚呼曰翁父遷擢視金多寡工部郎中王祐以善諂擢本部侍郎兵部尚書徐晞等多至屈膝其從子山林悉蔭都督指揮等官私黨馬順郭敬陳官唐童等咸肆行無忌振自謂威無不加遂構釁瓦刺竟以此敗瓦刺者元裔也十四年其太師也先以二千人貢馬號三千振以爲詐減馬直其使者恚而去秋七月也先遂大舉入寇振挾帝親征廷臣交諫弗聽至宣府大風雨復有諫者振益虓怒成國公朱勇等白事咸膝行進尚書鄺埜王佐忤振意罰跪草中其黨欽天監正彭德



清以天象諫振終弗從八月己酉帝駐大同振益欲北鎮守  
太監郭敬密告曰北必墮敵計振始懼班師至雙寨雨甚振  
初議道紫荊關由蔚州邀帝幸其第既恐蹂鄉稼復改道宣  
府軍士紆迴奔走壬戌始次土木瓦剌兵追至師大潰帝蒙  
塵振亦爲亂兵所殺敗報聞百官慟哭都御史陳鑑等廷奏  
振罪請滅其族給事中王竑等立擊殺馬順及毛王二中官  
郕王命鸞王山於市振族無少長皆斬籍其家得金銀六十  
餘庫玉盤百珊瑚高六七尺者二十餘株他珍玩無算并誅  
陳官唐童先是郭敬鎮大同歲造箭鏃數十甕以振命遺瓦  
剌瓦刺輒以良馬報振及敬西寧侯宋瑛駙馬都尉井源爲  
前鋒遇敵陽和敬又撓使敗及是逃歸亦坐誅英宗復辟用

太監劉恒言賜振祭祀之智化寺賜祠曰旌忠而振門下  
曹吉祥復以奪門功有寵顯政

曹吉祥灤州人素依王振正統初征麓川爲監軍征兀良哈  
與成國公朱勇太監劉永誠分道又與寧陽侯陳懋等征鄧  
茂七於福建吉祥每出輒選達官跳盪卒隸帳下師還畜於  
家故家多藏甲景泰中分掌京營後與石亨結率兵迎英宗  
復位遷司禮太監總督三大營嗣子欽從子鉉鐸鑄等皆官  
都督欽尋進昭武伯門下廝養乞恩冒濫者無虛日多至千  
百人朝士亦有依附希進者其權勢與石亨埒時竝稱曹石  
二人惡言官有言共譖於帝乃命吏部尙書王勦察核年三  
十五以上者留不及者調用於是給事何玘等十三人改州



判官御史吳禎等二十三人改知縣會有風雷雨雹之變帝乃悟悉還其職未幾二人爭寵有隙御史楊瑄張鵬劾之吉祥乃復與亨合乘間愬帝帝爲下瑄等詔獄而逮治閣臣徐有貞李賢等事具賢等傳承天門災帝命閣臣岳正草罪已詔詔語激切吉祥亨復愬正謗訕帝又謫正勢益張朝野灰目然帝英察見其所爲多私意稍稍疑及李賢力言奪門非是帝始大悟疎吉祥無何石亨敗隨亨冒陞賞者悉自首改正獨從吉祥者如故而吉祥以亨與已同功一體內不自安乃日犒諸達官金錢穀帛恣所用諸達官恐吉祥敗而已隨黜退也皆願盡力效死欽問客馮益曰自古有宦官子弟可爲天子乎益曰君家魏武其人也欽大喜因爲反謀天順

五年七月欽私掠家人曹福來爲言官所劾帝令錦衣指揮遂杲察之急而降勅徧諭羣臣欽驚曰前降勅遂捕石將軍今復爾殆矣謀遂決是時甘涼告警帝命懷寧侯孫鏜西征未發吉祥使其黨掌欽天監太常少卿湯序擇是月庚子昧爽欽擁兵入而已以禁兵應之謀定欽召諸達官夜飲時鏜及恭順侯吳瑾俱宿朝房達官馬亮恐事敗逸出走告瑾瑾趣鏜由長安右門隙投疏入帝急繫吉祥於內而勅皇城及京城九門閉弗啟欽知亮逸中夜馳往遂杲家殺杲使甲士殺都御史寇深於西朝房斫傷李賢於東朝房欽示賢以杲頭曰杲激我也遂攻東西長安門不得入縱火門內守衛者拆河壩輒石塞諸門賊往來叫呼門外鏜遣二子急召西征



軍擊欽於東長安門欽走攻東安門道殺瑾復縱火火將盡門內取薪益之火勢熾賊不敢入及天漸曙欽黨稍稍散去鐘勒兵逐欽斬鉉鑄鐘子軌斫欽中膊欽乃走突安定諸門門盡閉竄歸家拒戰會大雨如注鐘督諸軍大呼入欽投井死遂殺鐸盡屠吉祥家越三日磔吉祥於市湯序馮益及吉祥姻婭達官皆伏誅馬亮以告反者授都督英宗始任王振繼任吉祥凡兩致禍亂其他宦者若跛兒干亦失哈喜寧韋力轉牛玉率兇狡跛兒干本降番給事宮禁數十年及土木之敗卽助敵反攻射內使黎定旣又爲敵使至京有所需索景帝執而誅之亦失哈廣西人也鎮守遼東敵犯廣寧亦失哈禁制官軍不使出擊時遼東百戶施帶兒被獲於敵數爲

敵使張彼聲勢又爲脫脫不花致意於亦失哈正統十四年冬逃歸巡按御史劉孜鞠治之因劾亦失哈并及他不法十餘事景帝命誅帶兒而置亦失哈不問喜寧亦降番正統中御用監太監也鎮守遼東太監王彥卒英宗命寧檢閱其家財私取財物無算爲彥妻吳氏所訴詔宥寧罪而追田園鹽引給主餘物悉入官寧負寵侵太師英國公張輔使弟勝率家奴自宮者毀輔佃戶居室毆家人妻墮孕死事發宥勝贖徒戍其自宮者於南丹衛帝因敕禮部盡收功臣私蓄閹奴入官土木之役寧從帝陷於敵輒爲也先畫策邀求賞賜導以入邊寇掠尙書于謙授策邊將使人擒寧會上皇知寧謀患之言於也先使寧還京索禮物而命校尉袁彬以密書報



宣府寧至獨石遂爲叅將楊俊所誘擒至京文武大臣給事御史交章劾其罪詔羣臣雜治具服景泰元年三月磔於市韋力轉者性淫毒正統中鎮守大同多過惡景泰元年大同叅將許貴奏力轉銜軍妻不與宿杖死其軍又與養子妻淫戲射殺養子下巡按御史覆勘有驗都察院請再覆從之旣而釋不罪天順元年工部侍郎霍瑄先以叅政掌大同府事至是奏前事且言力轉僭用金器若王者及強娶所部女爲妾諸不法事帝怒遣人執之下錦衣衛獄力轉亦奏瑄與都御史年富侵盜官物且強娶所部女子十三人爲妾都察院請收瑄與力轉面質帝命俱宥之牛玉事詳吳廢后傳懷恩高密人本戴氏子宣宗殺兵部侍郎戴綸恩父太僕卿

希文綸族父也因綸故并籍恩方幼被宮爲小黃門賜名懷恩憲宗朝掌司禮監汪直理西厰梁芳韋興等用事恩班在前性忠鯁無所撓諸奄咸敬憚之員外郎林俊論芳及僧繼曉下獄帝欲誅之恩固爭帝怒投以硯曰若助俊訕我恩免冠伏地號哭帝叱出恩遣人告鎮撫司曰汝曹諂芳傾俊俊死汝曹何以生徑歸稱疾不起帝尋遣鑿視恩卒釋俊會星變罷諸傳奉官御馬監王敏請留馬房傳奉者帝許之敏謁恩恩大罵曰我曹壞國政故星變今甫欲正之乃復爲汝壞天雷擊汝矣敏自愧恨死進寶石者章瑾求爲錦衣鎮撫恩不可曰鎮撫掌詔獄柰何以賄進當是時尙書王恕獨以直諫名恩每嘆曰天下忠義斯人而已憲宗末惑萬貴妃言欲



易太子恩固爭帝不懌斥居鳳陽孝宗立名歸仍掌司禮監力勸帝逐萬安用王恕一時正人彙進恩之力也卒賜祠額曰顯忠同時有覃吉者以老奄侍太子太子年九歲吉口授四書章句及古今政典憲宗賜太子莊田吉勸母受曰天下皆太子有也太子偶從內侍讀佛經吉入太子驚曰老伴來矣亟手孝經吉跪曰太子誦佛書乎曰無有孝經耳吉頓首曰甚善佛書誕不可信也

汪直者大藤峽獠種也初給事萬貴妃於昭德宮遷御馬監太監成化十二年黑青見宮中妖人李子龍以符術結太監韋含私入大內事發伏誅帝心惡之銳欲訪外事直爲人便黠帝因令易服將校尉一二人密出伺察人莫知也獨都御

史王越與結歡明年設西廡以直領之列官校刺事南京鎮監覃力朋進貢還以百艘載私鹽騷擾州縣武成縣典史詰之力朋擊典史折其齒射殺一人直廉得以聞逮治論斬力朋後得倖免而帝以此謂直能擿姦直乃任錦衣百戶韋瑛爲心腹屢與大獄建寧衛指揮楊暉故少師榮曾孫也與父奉爲仇家所告方行勘暉逃入京匿姊夫中書董璘所與爲爲瑛瑛陽許暉而馳報直直卽捕暉璘考訊三琶之琶者錦衣酷刑也骨節皆寸解絕而復甦暉不勝苦妄言寄金於兵部主事叔父士偉直不復奏請捕士偉下獄并掠其妻孥獄具暉死獄中泰論斬士偉等皆謫官郎中武清樂章行人張廷綱叅政劉福等皆無故被收案自諸王府邊鎮及南北河



道所在校尉羅列民間鬪詈雞狗輒寘重法直每出隨從甚衆公卿值者皆避道兵部尙書項忠不避迫辱之權談出東廠上五月大學士商輅與萬安劉翊劉吉奏其狀帝震怒命司禮太監懷恩覃昌黃高至閣下厲色傳旨言疏出誰意輅等言汪直壞朝廷事輅等同心一意爲國除害無有先後翊慷慨泣言誓不與直共戴天恩遂據實以奏項之復傳旨勞輅等翌日尙書忠諸大臣疏亦入帝不得已乃罷西廠使懷恩數直罪而宥之令歸御馬監調葦瑛邊衛散諸旗校還錦衣中外大悅帝猶寵直不衰直因言閣疏出司禮監黃賜陳祖生意爲楊暉報復帝卽斥賜祖生於南京御史戴縉者九年秩滿不得遷怨望窺帝旨盛稱直功其年六月復詔直

開西廠以千戶吳綬爲鎮撫直欲愈熾未幾直令東廠官校誣奏項忠且諷言官郭鏜馮貫等論忠違法事帝命三法司錦衣衛會問衆知出直意無敢違遂勒忠爲民而左都御史李賓失直旨亦褫職尋諷鏜等劾免刑部尙書董方及尙書薛遠侍郎滕昭程萬里等大學士輅亦罷去乃以所善王越爲兵部尙書兼左都御史陳鉞爲右副都御史巡撫遼東十五年秋詔直巡邊率飛騎日馳數百里御史主事等官迎拜馬首箠守令劾戍江南巡撫牟俸各邊都御史畏直服橐韉迎謁供張百里外至遼東陳鉞郊迎蒲伏厨傳獨盛左右皆有賄直大悅惟河南巡撫秦紘與直抗禮而密奏直巡邊擾民帝弗省兵部侍郎馬文升方撫諭遼東直至不爲禮又



輕鉞直遂陷文升坐成由是直威勢傾天下矣直年少喜兵陳鉞諷直征伏當加立邊功自固直聽之用撫寧侯朱永總兵而自監其軍師還永封保國公鉞晉右都御史直加祿米王越又使直詐稱亦思馬因犯邊詔永同越西討直爲監軍越襲威寧海大克封威寧伯直再加祿米永無功而還已伏當加寇遼東亦思馬因寇大同殺掠甚衆遼東巡按強珍發鉞奸狀直右鉞謫珍於是天下惡直者指王越陳鉞爲二鉞小中官阿丑工俳優一日爲直狀武冠操兩鉞趨帝前旁人問之曰吾將兵惟仗此兩鉞耳問何鉞曰王越陳鉞也帝听然而笑稍稍悟然廷臣猶未敢攻直也會東廠尙銘獲賊得厚賞直忌且怒銘不告銘懼乃廉得其所洩禁中祕語奏之

且盡發王越交通不法事帝始疎直十七年秋命直偕越往宣府禦敵敵退直請班師不許徙鎮大同而盡召將吏還獨留直越直旣久鎮不得還寵日衰給事御史交章奏其苛擾大傷國體請仍罷西廠得旨朝廷自有處置閣臣萬安遂具奏力言之而大同巡撫郭鏜復言直與總兵許寧不和恐悞邊事帝乃調直南京御馬監降詔切責罷西廠不復設中外欣然給事御史遂爭言直罪請誅之以示戒帝乃降直奉御而褫逐其黨王越戴縉吳綬等陳鉞已致仕不問韋瑛後亦坐他事誅縉由御史不數年至南京工部尙書越鉞頗以材進縉無他能工側媚而已西廠廢尙銘遂專東廠事聞京師有富室輒以事羅織得重賄乃已賣官鬻爵無所不至帝尋



覺之謫充南京淨軍籍其家輦送內府數日不盡而陳準代為東廠準素善懷恩既代銘誠諸校尉曰有大逆告我非是若勿預也都人安之

梁芳者憲宗朝內侍也貪黷諛佞與韋興比而諂萬貴妃務為淫巧日進美珠珍寶悅妃意其黨錢能韋眷王敬等爭假採辦名出監大鎮帝以妃故不問也妖人李孜省僧繼曉皆由芳進共為姦利每以中旨授人官累數千人名傳奉官有白衣臘至太常卿者陝西巡撫鄭時論芳被黜陝民哭送之帝聞頗悔斥傳奉官十人繫六人獄詔自後傳旨授官者俱覆奏然不罪芳也刑部員外郎林俊劾芳及繼曉帝怒下之獄已星變言者復數十人俱不報居久之帝視內帑見累朝

金七窖俱盡謂芳及韋興曰糜費帑藏實由汝二人興不敢對芳獨曰建顯靈宮及諸祠廟為陛下祈萬年福豈糜費耶帝不懌曰吾不汝瑕後之人將與汝計矣芳大懼遂說貴妃勸帝廢太子而立興王帝許之會泰山累震占者言應在東朝帝懼乃止孝宗立言官交章論之謫芳居南京尋下獄興亦斥退正德初羣奄復薦興司香太和山兼分守湖廣行都司地方尚書劉大夏給事中周璽御史曹來旬諫不聽興遂復用而芳卒廢以死

錢能芳黨也憲宗時鄭忠鎮貴州韋朗鎮遼東能鎮雲南竝恣縱而能尤橫貴州巡撫陳宣劾忠因請盡撤諸鎮監帝不允而雲南巡按御史郭陽顧上疏譽能請留之雲南雲南與



安南壤接舊制安南貢道出廣西後請改由雲南弗許也能詐言安南捕盜兵入境請遣指揮使郭景往諭其王詔從之能遂令景由雲南入以玉帶綵繒犬馬屬景遺王安南報能禮甚厚景又給其貢使改道雲南而已先歸能復遣景與指揮盧安等往干崖孟密諸土司索貨寶至逼淫曩罕弄女孫許奏授宣撫未返安南使者至邊吏格之不得入乃去朝廷未之知也後三年事發詔巡撫都御史王恕廉之恕捕景景赴井死械其同行者送京且効能再遣刑部郎中鍾蕃往按事皆實帝宥能而命致其黨九人於法時指揮姜和李祥潛匿不就逮能復上疏爲二人求宥帝曲從之巡按御史甄希賢復効能因索守礦千戶三人金意不滿擅杖千戶一人死

事下都察院會王越爲都御史素附中貴人事亦寢而帝以恕故不得已召能歸安置南京其後恕爲南京參贊尙書能復竄緣得同守備然心憚恕訖不敢肆久之卒韋眷王敬亦芳黨眷爲廣東市舶太監縱賈人通諸番聚珍琦甚富請以廣南均徭戶六十隸市舶布政使彭韶爭之詔給其半韶尋調貴州眷又誣奏布政使陳選被逮道卒自是人皆懲韶選莫敢逆眷者弘治初眷因結蔡用妄舉李文貴冒紀太后族降左少監撤回京事詳紀太后傳敬好左道信妖人王臣帝嘗命敬使南方挾臣同行臣遂教敬僞爲詔括書畫古玩聚白金十萬餘兩至蘇州召諸生使錄妖書且辱之諸生大譁巡撫王恕以聞東廠尙銘亦發其事詔斬臣於被害州縣黜



敬克孝陵衛淨軍

何鼎餘杭人一名文鼎性忠直弘治初為長隨上疏請革傳奉官為儕輩所忌壽寧侯張鶴齡兄弟出入宮禁嘗侍內庭宴帝如廁鶴齡倚酒戴帝冠且與宮人戲鼎心怒他日鶴齡復窺御帷鼎持大瓜欲擊之張皇后銜鼎鼎奏言二張私入禁掖無人臣禮皇上若用臣臣必有以報后遂激帝怒下鼎錦衣獄問有主使乎鼎曰有問誰耶曰孔子孟子也給事中龐泮御史吳山及尚書周經主事李昆進士吳宗周先後論救俱不納后竟使太監李廣杖殺鼎帝追思之賜祭勒其文於碑是時中官多守法奉詔出鐘者福建鄧原浙江麥秀河南藍忠宣府劉清皆廉潔愛民兵部上其事賜勅旌厲又有

司禮太監蕭敬者歷事英宗憲宗諸習典故善鼓琴帝嘗語劉大夏曰蕭敬朕所顧問然未嘗假以權也獨李廣蔣琮得帝寵任後二人俱敗而敬至世宗朝九十餘始卒

李廣孝宗時太監也以符籙禱祀蠱帝帝頗信其術皇親以下皆父事廣廣因為奸弊矯旨授傳奉官如成化間故事四方爭納賄賂又擅奪畿內民田專鹽利鉅萬起大第引玉泉山水前後遶之給事中葉紳御史張縉等交章論劾帝任廣如故十一年廣勸帝建毓秀亭於萬歲山亭成幼公主殤未幾清寧宮災日者言廣建亭犯歲忌太皇太后恚曰今日李廣明日李廣果然禍及矣廣懼自殺既死帝疑廣有異書使使即其家求之得賂籍以進多文武大臣名餽黃白米各千



百石帝驚曰廣食幾何廣家亦甚隘豈能容是米哉左右曰黃米者黃金白米者白銀也帝怒下法司究交結廣者於是給事御史疏糾武臣保國公朱暉以下八人文臣吏部尙書屠滹以下二十餘人壽寧侯張鶴齡爲解帝寢勿治廣初死時司設監太監爲壽祠額葬祭及是大學士劉健等言廣罪惡顯著尙蒙恩澤非國典帝乃罷給祠額猶賜祭

蔣琮大興人事孝宗掌印綬監有小才僞爲正論以迎合帝指李孜省遣戍遇赦琮言孜省罪大不可宥械入京掠死帝遣之命守備南京沿江蘆場舊隸三廠成化初江浦縣田多沉於江而瀕江生沙洲六縣民請耕洲補沉江田洲與蘆場近又瓦屑壩廢地及石城門外湖地故給民承業輸租守備

廳皆不隸三廠太監黃賜爲守備時受奸民獻俱指爲蘆場盡收其利民已失業而歲額租課仍責償之民孝宗立縣民相率愬於朝下南京御史姜綰等覆按琮始至移御史使斷歸三廠弘治二年綰等劾琮與民爭利且用揭帖抗詔旨刑部尙書何喬新請行南京法司勘從之琮條辨綰疏而泛及御史劉愷方岳等及南京諸司違法事且言綰與喬新及主事曾望宏皆李孜省同鄉代爲報復其年星變給事中韓重請斥琮及太監郭鏞范麒麟等以弭天怒會太監陳祖生奏戶部主事盧錦給事中方向私種南京後湖田亦發南法司勘後湖者洪武時置黃冊庫其中令主事給事中各一人守之百司不得至歲久湖塞錦向於湖灘稍種蔬伐葦給公用



故爲祖生所奏勘未竟適郭鏞奉使兩廣道南京亦乘舟往觀焉御史孫紘等因劾鏞擅遊禁地鏞怒歸愬於帝言錦向違法事多府尹楊守隨勘錦向失出御史不劾奏獨繩內臣帝乃遣太監何穆大理寺少卿楊謐再勘後湖田而綰琮更訐奏不止因令穆等并覈之明年穆謐奏湖田事實褫錦職謫守隨向以下官有差又勘琮不當受獻地私囑勘官所訐御史違法及喬新望宏爲攷省奸黨皆誣綰等劾琮亦多不實竝宜逮治詔獨逮綰等命琮所占官房酒樓地悉歸之官御史伊宏給事中陳璠等皆言不宜以一內臣而置御史十人於獄不聽獄上綰等俱譴級調外省琮不問時劉吉竊柄素惡南京御史劾已故典此獄尙書王恕李敏給事中趙竑

御史張賓先後言琮綰同罪異罰失平亦不納琮由是益無忌久之琮復劾郎中姜性修運河不法帝命給事中任綸郎中盛弘御史劉瑋往勘琮又奏綸等潛易故案并言兵部員外郎袁爍侵蝕船價罪亦連性性疏辨會廣洋衛指揮石文通亦奏琮僭侈殺人掘聚寶山傷皇陵氣及毆殺商人占役軍匠侵奪官地私造馬船諸罪再遣使覈治事皆實琮免死充孝陵淨軍性亦罷歸

劉瑾與平人本談氏子也幼自宮投中官劉姓者以進因冒其姓孝宗時坐法當死得免居常鬱鬱切齒廷臣武宗卽位掌鐘鼓司慨然慕王振之爲人性很戾有口辨與馬永成高鳳羅祥魏彬丘聚谷大用張永等相要結日以鷹犬歌舞角



觝之戲與帝狎導帝微行帝大歡樂之人號八虎尋改瑾內官監總督團營帝漸信用瑾孝宗遺詔罷中官監鎗及各城門監局瑾皆格不行而勸帝令內臣鎮守者各貢萬金奏置皇莊漸增至三百餘所畿內大擾外廷知八人誘帝游宴大學士劉健謝遷李東陽驟諫不聽尙書張昇給事陶諧胡煜楊一瑛張禴御史王渙趙佑南京給事御史李光翰陸崑等皆疏論之不聽五官監候楊源以星變陳言帝意頗動終不能改也健遷等遂連疏爭之未下會戶部尙書韓文率諸大臣請誅瑾等帝乃使司禮太監陳寬李榮王岳至閣議遣瑾等居南京三反健等執不可尙書許進曰過激將有變健等不從王岳者素褻直與太監范亨徐智心嫉八人具以健等

語告帝且言閣臣議是健等方約文及諸九卿詰朝伏闕面爭而岳從中應之誅瑾等吏部尙書焦芳馳白瑾瑾乃率永成等夜伏帝前環泣帝心動瑾因曰害奴等者王岳也帝曰何也瑾曰岳結閣臣欲制上出入故先去所忌耳且鷹犬何損萬幾若司禮監得人左班官安敢如此帝大怒立命瑾掌司禮監永成驟掌東廠大用掌西廠而夜收岳及亨智充南京淨軍旦日諸臣入朝將伏闕知事已變於是健遷東陽皆求去帝獨留東陽而令焦芳入閣追殺岳亨於途筆智折臂時正德元年十月也尋以他事革韓文職舉朝大駭給事中呂翀劉蒞請留健遷不報守備南京武靖伯趙承慶傳翀蒞疏示府尹陸珩珩徧示諸司尙書林瀚見而嘆息南京給事



中戴銑等御史薄彥徽等合疏言元老不可去宦豎不可任  
瑾激帝怒盡逮之給事中六人御史十五人并狝蒞悉予杖  
而鑄珩瀚官勒致仕削承慶半祿南京副都御史陳壽御史  
陳琳王良臣主事王守仁復以救銑等謫杖有差瑾既得志  
乃毛舉官僚細過散布校尉遠近偵伺使人救過不贍因顯  
擅威福悉遣黨奄分鎮各邊敘大同功遷擢官校至一千五  
百六十餘人又傳旨授錦衣官數百員通鑑纂要成瑾誣諸  
翰林纂修官騰寫不謹皆被譴而命文華殿書辦官張駿等  
改謫及進呈超拜官秩駿由光祿卿擢禮部尚書他授京卿  
者數人裝潢匠役悉授官不與騰寫者亦竄名顯擢山西布  
政俞俊當罷賄瑾卽留任誣主事王綸御史潘鏜爲劉大夏

王岳黨勒致仕杖楊源至死用枷號法枷給事中吉時御史  
王時中郎中劉繹張瑋尚寶卿顧璿副使姚祥參議吳廷舉  
等竝撫小故枷瀕死始釋而戍之其餘枷死者無數逮郎中  
李夢陽下獄幾僇死錦衣獄徽纒相屬惡錦衣僉事牟斌善  
視獄囚也予杖錮之南京大臣張敷華楊守隨張昇閔珪等  
相繼罷去瑾每奏事必偵帝弄鷹犬時帝厭之亟麾去曰吾  
用若何事乃溷我自此大小事皆瑾專決不復白帝二年三  
月瑾召羣臣跪金水橋南宣示奸黨大臣則大學士劉健謝  
遷尚書韓文楊守隨張敷華林瀚部曹則郎中李夢陽主事  
王守仁王綸孫磐黃昭詞臣則檢討劉瑞言路則給事中湯  
禮敬陳霆徐昂陶諧劉蒞艾洪呂翀任惠李光翰戴銑徐蕃



牧相徐暹張良弼葛嵩趙士賢御史陳琳貢安甫史良佐曹  
閔王弘任諾李熙王蕃葛浩陸崑張鳴鳳蕭乾元姚學禮黃  
昭道蔣欽薄彥徽潘鏗王良臣趙佑何天衢徐珏楊璋熊卓  
朱廷聲劉玉等皆海內號忠直者也又令六科寅入酉出使  
不得息以困苦之令文臣毋輒予封誥錦衣指揮楊玉劾府  
丞周璽輕武臣不用申狀瑾怒杖殺璽御史李高副使張天  
衢蘭州知州姜閔與游擊徐謙互訐瑾右謙戍高等又更舊  
制凡羣臣奉使不得過家給假逾十日者停職任皆以痛繩  
文吏寧王宸濠圖不軌賂瑾求復護衛瑾予之濠反謀遂成  
瑾不學每批荅章奏皆持歸私第與妹婿禮部司務孫聰華  
亭大猾張文冕相參決文冕聰不文辭率鄙冗焦芳爲潤色

之東陽頰首而已侍郎郝志義卒其子序請卹瑾惡志義勿  
予且罪序又以序所坐輕杖謫刑部主事李璋以失出削御  
史金洪恤刑主事趙廉籍又以論劾過當褫故御史呂鏜有  
罪人溺水死乃坐御史匡翼之罪嘗求學士吳儼金不應怒  
又聽都御史劉宇讒怒御史楊南金時方大計外吏瑾忽批  
奏尾并落儼南金職奪魏家店民田爲皇莊奪無錫縣田與  
魏國公徐備擅授播州土司楊斌爲四川按察使用私人文  
貴爲大同巡撫貴請太倉金築墩臺入瑾者三之一越次擢  
王瓊吏部侍郎賄不足旋改南京擢行太僕丞陳璣爲太僕  
丞至令奴壻閻潔督山東學政瑾威權益盛公侯勲戚以下  
莫敢鈞禮每私謁相率跪拜諸章奏先具紅揭投瑾號紅本



然後上通政司號白本皆稱劉太監而不名都察院奏讞誤名瑾瑾怒詈之都御史屠瀟恐率屬跪謝乃已三年瑾託言邊倉芻粟多朽腐奏每歲九月遣使察覈於是都御史周南張鼐馬中錫湯全劉憲布政以下官孫祿冒政方矩華福金獻民劉遜郭緒張翼郎中劉繹王蓋等並以赦前罪被逮下錦衣獄追補邊釐憲至瘐死又察鹽課杖巡鹽御史王潤逮前運使窩舉楊奇等察內甲字庫謫尚書王佐以下百七十人復劾罰米法嘗忤瑾者皆槌發輸邊故尚書雍泰馬文升劉大夏韓文許進都御史楊一清李進王忠侍郎張縉給事中趙士賢任良弼御史張津陳順喬恕聶賢曹來旬等數十人悉破家死者繫其妻孥其年夏御道有匿名書詆瑾所

行事瑾矯旨名百官跪奉天門下瑾立門左詰責日暮收五品以下官盡下獄其明日大學士李東陽申救瑾亦微聞此書乃內臣所爲始釋諸臣而主事何鈺順天推官周臣進士陸伸已暍死矣是日太監李榮以冰瓜陷羣臣瑾見而惡之瑾欲令武士於各官家收藁太監黃偉曰彼爲此事雖妻子不知安肯留藁瑾乃已偉見僵仆者數人復言書所指皆爲國爲民事挺身自承雖死不失爲好男子奈何枉累他人瑾怒即日傳旨榮私宅閒住偉南京閒住時東廠西廠緝事人四出道路惶懼瑾復立內行廠尤酷烈中人以微法無得全者又悉逐京師傭令寡婦盡嫁喪不葬者焚之萬姓洶洶幾致亂追論岑猛叛事謫戍劉大夏潘蕃革伏羌伯毛銳祿秩



又逮前御史葛浩陸崑至再杖之繫靖海衛百戶張琮等追  
籽粒籍故通政強珍家其二子論死都給事中許天錫欲劾  
瑾懼弗克懷疏自縊給事中周鑰勘事歸道淮安貸金賂瑾  
度弗給自剄而御史儲珊奉使獨以所劾多陞俸明年瑾奏  
於朝陽門建元明宮奪猫竹廠地以益之方廣數百頃毀廬  
舍發塚墓無算瑾追怨劉健謝遷不已會浙江舉懷才抱德  
之士餘姚周禮徐子元許龍上虞徐文彪瑾曰何餘姚隱士  
之多也矯旨下四人獄坐充軍罰布政按察諸官米而以遷  
籍餘姚革其職仍令餘姚人毋授京官且并革健職張綵言  
於瑾曰今天下所餽遺公者非必皆私財也往往貸京師歸  
則以庫金償公何爲斂怨貽患瑾然之會御史歐陽雲馬昊

胡節鄭宣給事中吳儀邵天和沈照侍郎張鸞少監李宣錦  
衣指揮同知趙良等以故事入賂瑾皆舉發致罪乃遣給事  
御史十四人分道盤察令下有司爭厚斂以補帑听遣人率  
阿瑾意專務搏擊給事中李淳御史仇惠察延綏劾尙書顧  
佐侶鍾韓文以下三十九人御史喬岱察浙江急責鹽運使  
楊奇以下二十七人逋課奇死至鬻其女孫而給事中安奎  
潘希曾御史趙時中阮吉張彧劉子厲以無重劾下獄奎彧  
枷且死李東陽疏救始釋爲民希曾等亦皆杖斥給事中曾  
大顯降浙江布政司照磨御史劉金降桃源縣丞仍各予杖  
亦皆以盤察忤瑾意也瑾又矯旨籍故都御史錢鉞徙謫其  
妻子籍禮部侍郎黃景坐充軍分徙其家人毋令同地後又



籍故尚書秦紘株及巡撫朱欽罰米凡瑾所逮捕一家犯鄰里皆坐或瞰河居者以河外居民坐之屢起大獄冤號遍道路先是焦芳以其子黃中殿試不得一甲怒瑾亦惡翰林官素不下已及孝宗實錄成翰林預纂修者當遷秩芳說瑾翰林官當擴充政事於是侍講吳一鵬編修顧清等十六人俱調南京六部是時內閣焦芳劉宇吏部尚書張綏兵部尚書曹元錦衣衛指揮楊玉石文義皆爲瑾腹心變更舊制令天下巡撫入京受勅輪瑾賂延綏巡撫劉孟不至逮下獄宣府巡撫陸完後至吏部劾之幾得罪旣賂乃令試職視事都指揮以下求遷者瑾第書片紙曰某授某官兵部卽奉行不敢復奏邊將失律賂入卽不問有反陞擢者鎮西將軍曹雄至

爲子娶瑾姪以相倚重都給事中李憲御史顏正等競奔走其門詆劉健謝遷劉大夏等爲奸邪請追奪封誥瑾大喜追奪者凡數十人瑾又遣其黨文邊塞屯地戶部侍郎韓福文遠東誅求苛刻邊軍不堪焚公廨守臣論之始定給事中高滂文滄州所劾治六十一人至劾其父高銓以媚瑾五年刑部讞占城國使人亞劉謀逆獄上劉本江西萬安人瑾忽矯旨言江西土俗刁敝如彭華李裕尹直等咸干物議其裁鄉試額五十名仍禁授京秩如餘姚以焦芳惡華故也瑾又自增陝西鄉試額至百名亦爲芳增河南額至九十名以優其鄉士云其年帝大赦瑾峻刑自如刑部尚書劉璟無所彈劾瑾詬之璟懼劾其屬王尙賓等三人瑾乃喜給事中郝夔核



榆林功懼失瑾意自縊死給事中屈銓祭酒王雲鳳皆請編  
瑾行事著為律令大理評事羅僑獨抗疏指斥時政瑾怒鐫  
秩去四月安化王寘鐸反檄數瑾罪瑾始懼匿其檄而起都  
御史楊一清太監張永為總督討之初劉健等糾八虎瑾尤  
狡獪為七人所推及專政七人有所請瑾俱不應永成大用  
等俱怨瑾又欲逐永永以譎免及永出師還與一清言欲誅  
瑾一清為畫策永意遂決瑾好招致術士有俞日明等妄言  
瑾從孫二漢當大貴瑾因是遂謀不軌兵仗局太監孫和數  
遺以甲仗兩廣鎮監潘午蔡昭又為造弓弩瑾皆藏於家會  
瑾兄都督同知景祥死京師私語籍籍謂瑾將以八月十五  
日俟百官送葬因作亂適永提疏至將以是日獻俘瑾使緩

其期欲俟成事并禽永或以告永永遂先期入獻俘畢帝置  
酒勞永瑾等皆侍及夜瑾退永出寘鐸檄因奏瑾不法十七  
事帝已被酒俛首曰瑾負我永曰此不可緩緩則奴輩皆齏  
粉陛下安所歸乎永成等亦助之乃命長隨四人往帝乘馬  
隨後瑾出遂執之夜開東華門繫於菜廠分遣官校封其內  
外私第次日晏朝後帝出永奏示內閣降瑾奉御謫居鳳陽  
及帝親藉其家得偽璽一穿宮牌五百及衣甲弓弩袞衣玉  
帶諸違禁物又所常持扇內藏利匕首二金銀數百萬珠玉  
寶玩無數始大怒曰奴果反趣付獄於是六科給事中謝訥  
十三道御史賀泰等列奏瑾十九大罪請加誅修命百官鞠  
於午門外瑾具服詔磔於市梟其首榜獄詞處決圖示天下



怨家爭購其肉有生啗之者二漢等十五人及石文義楊玉張文冕等俱就戮張綵獄斃磔其屍曹雄韓福充軍其黨自閣臣焦芳劉宇曹元而下尚書畢亨朱恩等共六十餘人皆降謫已廷臣奏瑾所變法吏部二十四事戶部三十餘事兵部十八事工部十三事詔悉釐正如舊制

谷大用者瑾掌司禮監時提督西廠分遣官校遠出偵事江西南康民吳登顯等三家五月五日為競渡校歸白大用誣以擅造龍舟籍其家天下皆重足屏息建鷹房草場於安州奪民田無數瑾誅大用辭西廠未幾帝復欲用之大學士李東陽力諫乃止六年劉六劉七反命大用總督軍務偕伏羌伯毛銳兵部侍郎陸完討之大用駐臨清召邊將許泰邵永

江彬劉暉等入內地聽調遣久之無功會賊過鎮江狼山遇颶風舟覆陸完兵至殲之遂封大用弟大玘為永清伯而先時平宣鑄時其兄大寬已封高平伯矣其義子冒陞賞者不可勝紀在軍中無他長視官軍破賊則爭取子女金帛賊逸則割良民首上功先後費帑金二百餘萬世宗立以迎立功賜金幣給事中閻閔極論之尋降奉御居南京已召守康陵嘉靖十年籍其家魏彬當瑾時總三千營瑾誅代掌司禮監其年敘寧夏功封弟英鎮安伯馬永成兄山亦封平涼伯彬益貴顯用事與江彬婚相倚為奸利太監張忠于經蘇進等皆彬黨也世宗立彬不自安為英辭伯爵詔改都督同知世襲錦衣指揮使給事中楊秉義徐景嵩吳巖皆言彬附和逆



瑾結姻江彬宜置極典帝宥不問已而御史復論之始令聞住

張忠霸州人正德時為御馬監太監性兇暴侍豹房數談武藝誘帝巡幸邊塞結霸州盜張茂為弟所剽掠半入忠家茂因得入豹房侍帝蹴鞠河間府參將袁彪捕茂急忠為置酒名彪使茂偕坐屬彪曰此我弟也毋相厄又謂茂曰袁將軍許爾矣爾自今勿犯河間彪畏忠唯唯而已寧王宸濠謀逆忠先與臧賢錢寧等受其賂及賢寧敗忠獨免帝南征次良鄉忠邀帝幸其第會都御史王守仁奏捷至忠及江彬勸帝縱宸濠使再戰而帝自禽之帝亦欲泝湖湘浮江漢遍覽蘇杭江浙之勝聞忠等言大悅至南京乃命忠偕許泰往捕餘

黨忠益恣行威虐殺僇無辜民不勝擾

張雄者以司禮太監侍豹房有寵與張忠張銳竝恣肆用事時號三張宸濠欲結納雄銳賂伶人臧賢以通銳賂太監商忠少監盧明以通雄餽各萬計自是相問遺不絕濠有所奏請二人必助成之以至於叛初雄怨其父聽後妻言逐已致使自宮既貴拒父不得見同儕勸之乃召父至垂簾杖之已相抱泣不授父千戶尋超授右都督後張永發宸濠結納事忠明俱論斬雄下獄

張銳掌東廠又侍豹房恃寵恣橫勢燄薰灼嘗因捕妖言劉學孟貴功加祿米至一百二十石內官秩止四品加祿十二石準文一級百二十石則十級矣其壞亂祖制如此每緝事



先令邏卒誘愚氓爲奸已乃捕之得賄則釋所獲不可勝紀撓諸司權稍拂意卽中以禍人尤畏之是時侍帝豹房者又有孫和劉養佛保趙林馬英劉拳周昂等而于經吳經蘇進尤親暱于經性貪黷誘帝開皇店於九門及通州宣大諸鎮侵牟不<sub>止</sub>建香山碧雲寺極其巍煥特邀帝幸焉又爲帝治御女藥帝因此陽痿十餘年不入大內遂至絕嗣後忤旨命安置內書堂受翰林約束自是不得見帝而死吳經從帝南巡先至揚州奪民居壯麗者改爲提督府密偵諸寡婦處女在所夜半詐言駕至令通衢燃炬經遍入所偵家畧諸婦女以出納府中號哭震遠近尋分送苑寺許以金贖貧者或忿恚自經蘇進侍帝於豹房最爲親暱旦夕不離左右首導帝

巡幸帝南征還寢疾豹房惟進及陳敬二人侍語之曰朕病不可爲矣爾等與張銳可名司禮監以朕意達皇太后天下事重其與輔臣議處之前此事由朕自悞非若曹所能預也世宗立用御史王鈞蕭淮等言張忠于經蘇進發孝陵衛充軍張雄張銳等下都察院鞫治悉革其弟姪爵廕海內快焉他若劉祥廖堂王堂史宣杜甫者皆於武宗時奉使貪橫所至爲民害者也

劉允在正宗朝司設太監也正德十年奉勅往烏思藏迎番僧號活佛者賜法王金印以珠璣爲旛蓋黃金爲器皿所齎珍寶金幣以百餘萬計內府積貯爲空廷臣交諫不聽舟至臨清運艘爲之阻截比入峽舳艫連屬二百餘里佳成都歲



餘治入番供具又以數十萬計公私匱竭既至其僧懼中國  
 誘誅不敢出允怒欲脅之為番人所襲盡亡其寶賂器甲將  
 校死者二人士卒數百人傷者半之允得良馬走免及歸武  
 宗已出元史遂獲罪

時苦隆輦慶堂王堂中宜出南清省公方宗制尋出金黃計  
 近東賊賊險善不借察制辭命悉革其軍致自亂內外無  
 所宗立困憐史王陰蓄策善言熱忠干絲藕幾終奉制論次  
 事重其與神曰籍與之曰此軍由知自與非若曹視諸軍也  
 不可欲笑爾善與幾幾可台河縣溫曰知意鼓皇天氣天不  
 遂幸帝南並數變夷漢其糾叛又刺逆二人皆帝之曰知家



